

260.95  
275

嘉靖羅田縣志 甘肅 題

明代縣志 伏數百年  
百計訪購 捐印流傳  
凡我同人 竭力保有  
傳示千秋 子孫世守  
先正心血 庶幾不朽

重刻嘉靖羅  
田縣志八卷  
附錄一卷

丙寅秋月青垞校印

於武昌行館

潛江甘鵬亨書

重刊嘉靖羅田縣志序

寶沅之長羅田也爲日至淺又當兵匪俶擾之世奚暇而爲表章文獻計今迺獲取明志祖本重予覆墨是何故哉其先蓋有啟予者在也憶癸亥初秋奉檄長縣在會城與都人士相見頗有期予爲脩纂方志之謀者予心知今日非修文之時雖在本縣之志具有資料並主此事亦有人然而默察舉世之人心風習往而不返凡屬舉辦名雖美而實則非徒供一時擾亂掠奪之資藉是以徘徊審顧憚於一發卽發亦必至不可收拾而止近十許年來所見皆如是也不然生平微尙所在顧獨何心臨流返駕漠然無所動於中也哉惟是垂老而結習未忘儻竟無鴻雪之留遺此心終無以自釋於時王青坨學部方以所得明代祝侯珣倡修之志相視並爲縷述得此書之艱與其在今日胸有放佚之危始欣欣然喜曰是可重印以餉縣人士而少彌余此行未及修復文獻之憾也蓋嘗取而繹之珍卿縣侯爲章文懿弟子已箸列萬季野儒林宗派文懿修蘭谿志以簡要名天下爰卽據爲體要並於去任時付之閩

嘉靖羅田縣志

重刊序

學魁碩蔡教諭元偉俾董其成教諭亦張清恪道南源委中人也惟是時修志風尙相率以墨守功令惟景泰中頒行之寰宇通志爲歸卽本志凡例所稱大明一統志之原名也其間奮一家之言如康對山之志武功韓五泉之志朝邑更以仿漢書史記風動一世於是斯志及章志固不在此範圍中此珍卿松莊修書淵源之可考者而彼兩君子者生承平明備之會以講學之儒又得共事一方相與修明廢墜剔幽隱以照後世在今日猶動人流連慨慕而况於身親其樂者乎此又當日遭逢之可羨者若其取材之過儉審度之未精要自無庸爲諱良由當時官師邑士藏書絕少舉所謂網羅羣乘經緯四部者均無暇措意特因時因地卽張玉泉師弟所零拾者整理之而明代講學之家復無清代史家考訂鑒別之雅尙故雖經歷次官紳之手而陳芝麓趙南濱者流率文士而非史才故其譌缺觸目孔多要其成書之矜慎內就鑿括外難燕濫則迥非清代幾次縣書所及若取以訂補後來四次之志其益尤非淺渺且其書自天一閣收藏孤本外海內更無第二副鈔而羅田明代先達遺著

祇萬仙逋方書與此編能逃於兵革劫火之外所謂中流失船一壺千金者非歟然則此邦之士夫及官斯土者可膜視委棄而不思鄭重表縵也乎寶沅老矣自審無可藉以結緣此邦學者特割廉二十萬錢浼青坨爲校印以永餉今後同志諸君青坨以癸卯第三入出余房平日談藝論心相視莫逆其近歲校書都門與文郎仲立發國家圖書館祕冊所得於茲方墜沈之文獻常以相示蔚成大觀今春又聞其舉仲立未成遺稿爲祝志訂補十六卷余可斷其爲方志不朽盛業能發乾嘉諸老屐齒未到之瓊觀惜乎逢時不祥挾可爲之具當不可爲之時僅得相與重嘯古人已燼之燄而仲立早世借抱未抒此次又嗇於資不克取訂補同時付削僅得取仲立臨沒之夏手輯本志附錄一卷鐫之是又寶沅臨穎躊躇而未能已已者爾乙丑首夏從化李寶沅

羅田縣圖志序

羅田荆楚之陬區而黃州之隸邑也其衣桑麻其食穀粟肉蔬無魚鹽市舶通商之利故其俗勤生而力本無金玉貨貝綺縠繪錦珍禽怪獸名花異材之產故其俗質約而隘無車馬絡繹將迎供億之擾故其俗惜費而憚役無百工衆技紛華盛麗之飾故其俗專一習業而不遷瑀之始至也甚宜之以爲易治旣而迎日輦見民數之寡弱遇大饑見杼軸之空竭隨逢巨寇見武備之疎虞輒歎曰亦凋弊創殘之地也可無惕乎乃於經理之暇不敢荒寧咨詢典故欲深究其殘弊之源而潛圖所以培養封植之策皆漫無所徵蓋爲之鬱悒而太息旣乃得一志稿於蔡生唯忠脫畧憲裂條次混亂問之謂張玉泉諸名公相繼受周忠州勞崇德之託而筆削者也猶幸其綱要之所在未甚至磨滅得以緣舊而增新嗣是而莫之繼世遠人亡文獻不幾於泯乎爰禮羅外史楊君鸞洪君炯以董其事暨張生濬蔡生唯忠唯孝以專其勞搜羅覲縷摺摭融液越五旬宏綱細目草創略具頃

羅田縣志

序

之楊君遷蔡君元偉繼至未幾瑀亦濫膺行取之

命乃執簡授蔡君使踵志而纂成焉惜不及見其梓行而舟已先登矣然追思不佞之所以不其負於羅之民與民之所以獲安於殘弊之餘如危石衝流之不至於崩摧而潰決者則茲志之助與爲多焉嗚呼志之成於羅者若是其遲且難而其裨於政者又若是其明且易也後之人按圖觀風昭如指掌卽其類而求焉蚤夜以思之思通而行之其於報政之速也何至如瑀之樸鈍連蹇攸攸恤恤而僅得之者哉因僭識之以遺來者

嘉靖壬寅夏四月念五日

文林郎知羅田縣事蘭江前溪神瑀書

羅田縣志凡例

- 一 羅自有縣以來無志可徵考諸志於郡志於藩者失之略藏於故老者失之亂雖經訂於閩之陳芝麓粵之趙南濱羅之張玉泉亦未就緒今乃得因諸公之筆而證之以藩郡之史搜羅舊聞徧訪新見分類以書其中有遺漏者俟博雅之君子補焉
- 一 志中書法大略仿
- 一 大明一統志及史綱大書分註使觀之者易見其顛末
- 一 公署先縣治以下而後府館以上者由卑以達尊也且以見主客之義焉不及學者已詳學校志也
- 一 前輩行實不敢妄評但錄其所嘗見稱者附於科目之下其生存者只具載所歷之官蓋公論未定當以俟後之君子也貞烈無所於考只憑郡志若忠節孝義所載則論定而書無容議矣

羅田縣志

凡例

- 一 唐友義不仕而不列之隱逸者友義既舉於鄉則有天下之志矣而又不仕焉固非其本情也忠義之篤節概之高今之人猶能言之噫可尙哉
- 一 王氏不嫁廢夫婦之倫也而附之貞烈者末世教衰淫風莫禁有如王氏雖賢者之過而亦人之所異也故附書之
- 一 藝文有志他志皆大書於後今只分註於各類之下而藝文只標其端者所以便觀覽也其間工拙不同皆詳載者以有關風教或係名公筆跡故不敢遺然其所刪去亦多矣
- 一 清軍非羅田講武之事而列之脩武者軍以衛民國家之武備孰大焉而且自羅田以充之不附之脩武將何居乎此有志於天下爲公之意也
- 一 脩武志民兵畧而軍政詳者蓋民兵借力於農更代不一但以時練之足矣軍政則清勾之擾吏書之弊有不可勝言者故特詳焉
- 一 災異有志而祥瑞僅附焉者春秋記災異不書祥瑞其意微矣况所載乃瑞之

末者可特志乎然則曷不去之傳習已久不以自我而廢也  
一百神祠以下不附於廟祀而別之雜志者所以崇中正黜奇袤也東獄非淫祠  
而亦別之何也非羅邑之所宜專也  
一志之例大抵諱惡而彰善稽實而闕疑詳沒而畧存防諛而去誣

羅田縣志

凡例

二

羅田縣志目錄

卷之一

地理志

星土

建置

疆域

附驛程

形勝

山川

城郭

坊鄉

市鎮

風俗

橋渡

塘堰

卷之二

食貨志

土田

物產

戶口

貢賦

附倉庫

役法

附工役

卷之三

官師志

職制

歷官

名宦

公署志

羅田縣志

目錄

署舍 舖舍

卷之四

學校志

儒學 社學

人物志

科貢 薦辟

忠臣

節士

孝子

義士

貞烈

恩封

流寓

卷之五

惠政志

預備倉

養濟院

惠民藥局

義塚

附官渡

祀典志

廟祠

壇壝

卷之六



藝文志

詩賦記銘祭文

脩武志

民兵軍政關寨鄉堡

巡警冷鋪附

卷之七

災異志

水旱盜賊

祥瑞附

卷之八

雜志

古蹟 塚墓 寺觀 祠宇 亭閣 仙釋


按志之首地理何也非地則志莫之肇以作也緣地以起志故地理焉先財者土之所鍾而賦役胥原之以出也故食貨次之財萃而無統則爭故受之以官

羅田縣志

目錄


一一

師以統治而公署則官之所居也既治而不教則愚故受之以學校以施教而人物則教之所成也宣慈布惠治之本也崇正闢淫教之經也故次惠政次祀典文事武備不可偏也守成戢亂不可廢也故次藝文次修武天行人事之參會而咎徵應焉遇災者可不知懼乎災異所以居於志之終也遺事遺文之隱見而古迹係焉類書之則非其要矣雜志所以列於志之末也此序次之大凡也



羅田縣廟學圖

# 羅田縣公署圖



# 羅田縣志卷之一

## 地理志

唯王建國辨方正位體國經野有四方之史後世郡邑圖志基焉是故察星土而分界明矣詳建置而沿革昭矣辨疆域而遠邇定矣觀形勝觀山川觀城郭而險固設矣觀坊鄉觀市鎮觀風俗而民治彰矣觀橋渡觀塘堰而民利興矣凡吏茲土者所宜知也志地理

星土

分野之說其來舊矣自周禮春秋傳及歷代史志咸載焉郎官上應列宿出宰百里則察乾象觀妖祥以驗政治者固其職也其毋以天道遠而忽諸

禹貢荊州之域天文翼軫之次

周禮大司徒言十有二土不斥言所應者何次保章氏言星土辨九州之地不明言所辨者何星是分土分星不可以州國定名亦明矣主分野之是者則曰自張十七度至軫十七度為鶉尾之次當楚之分遂以楚為分星荊州之星土且驗以裨竈之知楚子及周楚惡歲害烏帑之事班固志又曰荆楚翼軫之分則羅田在禹貢荊州

## 地理志

卷一

一

之域今隸黃州而黃州又在楚江夏邦域之中抑豈出于翼軫之分野乎然天道玄微星經散亡無所於正姑錄此以俟後之君子攷焉

建置

羅田郡有六關亦咽喉險塞之地而土地分隸名號迭換歷代異宜不能相一苟不求其沿革之所自則後何所稽乎故備論之

羅田在禹貢荊州境內春秋為黃國地戰國屬楚漢隸江夏郡三國為吳隸蕪春郡晉隸弋陽郡北齊隸齊安郡梁置為義州及義城郡隋改為縣復隸蕪春郡唐省入蕪州浠水縣宋以石橋鎮仍陞為羅田縣元因廢復立大德甲寅知縣周廣遷官渡河隸蕪州路

變強按此於沿革太簡略不詳確須考正史地志及輿地專書再考定之語見訂補

本朝洪武乙卯改隸黃州府

羅田縣名古熊姓羅國也荊州郡今荊州府黃國即今黃州府齊安其地也江夏郡即今武昌府蕪春郡即今蕪州弋陽郡即今河南光州義州義城郡石橋皆在

今治之奉秦鄉舊縣魁山下也浠水即今浠水縣官渡河今治所臨以為襟帶者焉

以羅田為古羅國誤餘亦有誤均見訂補

疆域

志疆域禹貢弋成五服東漸西被之意也羅之疆域北枕固陵之墟南跨蕪陽之流東連英麓西接古亭環四隅而約之百里有奇吏士者中立焉可以定民矣

東西廣八十里南北袤一百六十里

東至英山縣界五十里

以落翎河為界自界至英山十里

西至黃岡縣界三十里 以尤河為界自界至黃岡一百三十里

南至蕪水縣界一十五里 以界河為界自界至蕪水一百里

北至固始縣界一百五十里 以松子關為界自界至固始二百五十里 ○按此有誤見訂補

東南至英山縣界五十里 以雞兒河為界自界至英山一十里

西南至蕪水縣界二十里 以曾家畝為界自界至水一百三十里 ○按曾疑曹謬

東北至霍山縣界一百二十里 以青苔關為界自界至霍山縣二百里

西北至麻城縣界四十里 以雙河口為界自界至麻城一百四十里

驛程

本縣至本府 陸路一百八十里水路五百里

至本省布政司 陸路二百五十里水路一百里

至南京 陸路一千一百里水路一千七百里

至京師 陸路三千六百八十里水路四千五百里

地理志 卷一

形勝

古人定鼎卜洛據地勢之雄其來遠矣羅阻山帶河山脈自多雲大霧經仙臺巖巖擁尖峯翔鳳凰屏於北河流自娥眉出紫檀沿北峯與多雲河合流經柳林迎山穿陶巖以遠於前而印臺浮水南以為案塔之詳何以得此固宜多得循良之吏而育毓人才之盛也 ○按此尚有最切之語未收見訂補

北接光蔡西連黃岡 宋新州與復舊治記南距大江北接光蔡西連黃岡東峙濠皖 ○按此有脫字見訂補

淮壩上腴 宋關詠新州神光觀記占淮壩之上腴

田輸井稅 唐權德輿送李處士弋陽山居詩不憚薄田輸井稅自將佳句著鄉閭

攀援雲磴萬疊翠嵐 多雲樓唱詩云一曲嘔噀萬疊山翠嵐晴滴露華寒攀援雲磴歸來晚猶覺餘香香竊聞

青雲萬仞 戴倫詩極目青雲萬仞梯金鳥刷尾又西飛

淮右名區 宋秦觀表矧斬春之便郡實淮右之名區 ○按此注及上行注均有脫字

鳳凰曉日 層巒巖巖孕奇形旭日初升五彩星人兆地靈知有待阿誰步武隴山名

龍井甘霖 水隨地脈去無垠誰信中涵造化神一縷好香和霧起萬村煙雨萬家春

塔寺鐘聲 古剎幽棲地更高蒲半清響出林阜朝朝暮暮何人道一百八聲縱復操

多雲樵唱 早起披雲競執柯擔頭擔穩復如何野人分願無餘事長放一聲山水歌

秋郊樹影

飄飄霜葉滿江村百影蕭疎日色曛  
莫訝晚風增慨嘆乾坤翕聚欲生春

義水東流

萬派瀾迴勢必東滔滔無念不朝宗  
酌來應邁貪泉化今古君臣道不窮

銅峭鑼壁

萬仞蒼崖倚壁空天然寫就玉芙蓉  
古今特立誰知已秀出風塵此道同

石險橫江

望中奇觀抑胡然萬石崢嶸迸玉泉  
銀漢橫邊星錯落天章依樣出人間  
以上俱訓導寧海石彬題咏

山川

在昔帝王建國封山以為鎮流河以為濟非以其與雲蒸霧以阜羣物育奇孕秀以產偉人其功用  
蓋昭昭若是與羅之山川疊嶂層巒經流環帶亦一方之鎮瀆也故因其方位考其名義而志之獨

加詳 ○按此於古山川名凡二  
焉 十四種均缺見訂補

塔山

在縣東五里其山層高唐時建寺於上因多塔故  
名元末兵燹遷城中去縣北三百步仍名塔山

印臺山

山在縣南一里為縣前案則  
名印臺為學前案則名書臺

桂家山

在縣東三里上有煙  
墩以為傳警之備

王道山

在縣東十里傳說有王  
姓昔修道於此故名

鉢孟山

在縣南三里形勢平  
秃如僧之鉢孟故名

迎山

在縣南十里雲出則雨諺  
云迎山雲起大雨千里

○按此見景泰寰宇通  
志此缺未引見訂補

地理志

卷一

三

望江山

在縣南十五里高出衆山去大江  
一百四十里登望咫尺在目故名

道峯尖

在縣東  
南十里

望道山

在縣東北十里以  
其面對道峯故名

娥眉山

在縣東北一百  
里上有娥眉庵

平頭嶺

在縣東  
十五里

仙人巖

在縣東二十里傳言仙  
人在此升天遺有鞋迹

花兒巖

在東縣二  
十五里

陶公巖

在縣南  
一里 ○按此有訛  
見訂補

牛頭巖

在縣東  
南十里

以上南條官渡河南境之山

鳳山

在縣北即今公堂坐山  
其形展翅如鳳故名

尖峯山

在縣北三里上有  
二尖疊出故名

仙臺山 在縣北十里

覆船山 在縣東十里其形如舟覆在河中故名

坐荆巖 巖上有荆百餘叢昔人設教此巖之陽取荆為教刑弟子皆成偉器

和尚山 在縣北四十里形如僧頂故名

大霧山 在縣北五十里天欲雨則霧起潏然 ○按大霧即大霧音變古零婁地有在今縣者見訂補

黃土壩 在縣北五里

揚旗山 在縣北七十里形如旗揚故名

汪家山 在縣西八里石壁間遺有仙人足跡

剪刀山 在縣西五里以形似故名

黨家山 在縣西一里

栗子壩 在縣西一十里

以上南條官渡河北境之山

# 地理志

卷一

四

鼓羊山 在縣西六十里

掛弓山 在縣北六十里

蘇雞山 在縣北六十里 ○按蘇雞為鳩茲音變樓子山亦鳩茲又名梳髻山 音變皆楚鳩茲名僅存者見訂補

李木巖 一名李莽巖在縣西北二十五里上有龍泉寺歲旱禱雨即應

獨坐山 在縣東北八十里其山形高出如人獨坐嘉靖戊子山神作異鄉人祠祀真武鎮之一時朝謁者甚衆未半年得鄉民香錢百餘兩貯庫知縣鄒明魁以淫祠毀之

泊高山 又名鶴皋峯在縣東北一百二十里

烏雲山 在縣西北七十里

練巖 在縣西三十里有瀑布瀉兩峯之下 ○按此見輿地紀勝寰宇通志此缺見訂補

豹龍巖 在縣西三十里形勢起伏如豹如龍

燕洞 在縣西五十里有門可入內藏雙燕翠羽大如雞其最深處有石壁高丈餘壁有石背俗號龍背遇旱焚劉背前即涓滴須臾如注立可滿瓶取出輒雨鄉人神之知縣徐泰親往禱雨果驗

山韭巖 在縣西九十里其地出韭其葉如蒜其味甚佳

石獅壩 在縣西北四十里有石獅出自天成故名

陸家塢 在縣西十里傳說有陸姓者居此故名

### 以上北條平湖河南境之山

魁山 在縣東六十里形勢嵯峨高出眾山故名宋建縣治於山之陽今廢 ○按此山脈有名茶山崗者即太平寰宇記及輿地紀勝之茶山吳元濟所取者見訂補

雪巖 在縣東四十里上有石巖巖上有井深數十丈宋石刻云斬春郡餘闕陵霍祐之奉檄來羅田勸諭賑糶同邑長知縣詹魯山相拉遊雪巖掃尉義與史季瞻吳郡駱客丁夢良錫山遂永叔三衢余正卿國泰徘徊逍遙殊不覺身在塵寰也時紹熙甲寅仲春日鐫又一石 ○按此有誤字詹魯山見刻淳熙戊戌西月惠卿陽開吳仁傑同立 ○葉水心先生集詳訂補

雲蓋山 在縣東三十里其上有井天旱禱之則應

朦朧山 在縣東四十里時有雲氣朦朧其上故名

鳳凰山 在縣東三十里山高聳秀如鳳翔翼故名 ○按此見輿地紀勝及寰宇通志另有見訂補

虎母山 在縣南二十五里舊志云此山高聳其形若虎而來跡且長衆石在於左右崇崇然若子之隨母故各一名古墓山

竹根山 在縣南二十里舊多竹故名

月山 昔有兄弟五人修道功成誓曰見險則過見月則止迨至此山月出今有廟在上

天明山 在縣南五十里

## 地理志 卷一 五

袁家山 在縣東南四十里石可燒灰 黃泥堂山 在縣東南二十里

觀音山 在縣東南六十里其山高聳上有一巖昔觀音現身於此至今遺像在石

藤子山 在縣東四十里 練石洞 在縣東南三十里山腰有石潭飛瀑五六丈 ○按此見輿地紀勝詳訂補

龍紫巖 在縣東南一百里此巖水出即雨遇旱禱之即應

豹龍洞 在縣東五十里內藏有古樂器通洞口處路甚險狹時人遇旱用繩援入取之轉雨雨過遂入

花蛇洞 在縣五十里曾有赤甲道人於內修行 ○按此產見夷堅志及輿地紀勝此佚見訂補

### 以上南條奉泰鄉河北境之山

雞籠山 在縣北七十里

狗耳尖 在縣北六十里兩山並起尖峯形如狗耳

七孃山 在縣北八十里傳說有女七人同此升仙

石柱山 在縣東北一百一十里高石屹立如柱 ○按此山蔡志以下謬云張飛留有書跡又訛作王曾誕誕可駭見訂補

松子山 在縣北一百四十里 ○按此漢松茲縣名之僅存者見訂補



多雲山

在縣東北一百五十里此山四時多雲氣雖晴日麗空雲亦連屬不絕故名郡守盧天台謫詩云萬仞峯高一湖寒亂花穿柳點征鞍琴絃振起塵妖息須信驪壇亦將壇

○按此見輿地紀勝名雲山即衡山音變張

鹽堆山

在縣東北一百五十里以形似名

鷹嘴巖

在縣東四十二里郡守盧濬過巖有詠云隘路人稀到春風我獨經萬山雲叶白一屋樹移青敢謂屠龍手聊尋瘞鶴銘野樽林淺酌落日恐猩猩

岐嶺

在縣東一百三十里

○按岐嶺見明史地理志上有梁武帝五嶽樓此佚見訂補

麻姑巖

在縣東八十里

老虎洞

在縣北一百四十里多雲鄉廣化寺左

含風洞

在縣北一百五十里多雲山下風一出能拔禾稼草木民甚畏之歲時致祭以祈免

風洞二

一在縣北多雲山之右一百六十里一在多雲鄉一百八十里其為患亦如風洞

藍家山

在縣東八十里○按此即藍慈兒至正中作亂所居里上有朝陽庵詳傅氏明書太祖本紀見訂補

以上南條多雲鄉河北境之山

淨瓶山

在縣東四十里以形似名

地理志

卷一

南保山

在縣東北五十里

亭子山

在縣東北四十里

馬家山

在縣東北四十里

青峯巖

在縣東北四十里

登場地

在縣東八里

以上南條多雲鄉河南境之山

官渡河

在縣南百步源出娥眉山紫壇衝沿北峯河西流與多雲河合經縣前出蘄水界河過黃岡巴河石潭口注之江

○按此與多鄉河西流平鄉河西流即宋人西流河所由名詳翠微北征錄蘄黃今訛作溢流西陽均

誤見訂補

北峯河

在縣北二十五里

○按北峯封鹽均應作豐北豐豐沿均古安豐名縣之僅存者見訂補

七楊衝河

在縣北二十里

白楊衝河

在縣東北一十五里

多雲鄉河

在縣東北一百里源出石柱山七里衝西流與東安河合北入北峯河口西下與官渡河合

八兒河 在縣東北五十里

東安河 在縣東北七十里 ○按此乃劉宋東安蠻縣舊名之僅存者見訂補

湯河二 一在縣東北東安河下其流有諸佛寺一在縣東北多雲河上俱四時泉湧如湯熱

龍潭河二 一在縣東北六十里東安河中有一潭激聲如播鼓噴水如拋珠俗名播鼓潭水絕即雨一在縣東南二十里龍潭河中有一潭澄清水深數龍潛之所云龍潭煙起雲時大雨

封鹽河 在縣東北八十里

深水河 在縣東二十里

橫河 在縣東北二十里

以上北峯多雲等河皆合流官渡河注之江為縣治第一重襟帶者也

奉泰鄉河 在縣東四十里源出魯治魁山南之膝騰東流為義水 ○按此為宋義安梁州郡之得名又名南入英山河下落翎河逾石險通白蓮河出蘭溪江 直河為宋直水蠻縣得名見訂補

落翎河 在縣東南五里

雞兒河 在縣南五十里

沃澤河 在縣南三十里

地理志 卷一

八油河 在縣東南六十里元時兄弟八人皆居此攬油功故河因以得名

石險河 在縣南五十里河中有石險景趣奇絕 ○按此宋名嶮石已見輿地紀勝此缺見訂補

本朝同知謝朝宜石險賦朝發藩川將之羅田道轉幽谷河渡白蓮脈徑路之崎嶇喜舟楫之輕便問津兮何處察遠兮窮源東接廬州之鄆西轉齊安之邊石橫截兮躡躡水今今潺湲舟返而物無人濟而雲塞此蓋天所以限乎西東繁名險而今傳於戲異哉易設守國傳城虎牢吾嘗聞險之名矣昔有龍門蜀有三峽吾嘗見險之形矣然形勝者名或不彰名聞者實或本著孰若險之專名於斯而雄據者也命舟子泝流指翠溪水故曲似山陰之有約崖石橫擊即亦壁之可樂瞬息咫尺水淵山巖萬竇生幽孤舟就泊曳杖遺遙可喜可愕波穹兮石摧石礙兮波迴無蚌兮噴珠不云兮蘇雷煙霞兮掩映心目兮明開避炎瀟風凭高遠望水水山山隨步其狀浪進而激石缺而崩相峙兮如較相軋兮如傾磊落兮如拳麟次兮如鯨或相傾而不墜或相較而勢爭斯物態之變化類人事之縱橫于是烹茶代酒拜石為朋有吟風之雅興其繁日之長繩已而歸舟順下林鳥欲投去危即安他復何求心悅兮有得履正兮無憂見險兮思欲知止過險兮豈宜重遊嗟乎羅田之險一方勝跡隱而弗顯識者心惻若實當道自貽伊戚嗟余視險幸當時一遇陰晦變怪百出雖心雄萬夫亦不免危慄若憚險阻必欲治平不思托根深固徒殫力而難成或者動搖山脈實足致陵谷之崩騰險在目前隱如勸勸王公特之以固其域時有常變安如一日君子思之以崇敬德遇有順逆介焉如石於戲日險而思無而忽思者當崇忽者恆辱我在平地無忽險中人因處險每見成功周除險害則探虎穴在昔有光于今為烈途險莫避取義成仁未險莫蹈明哲保身險乎險乎豈從來維時與義易稱大哉載籍郡志名險何年且喜沈公之詩惜無蘇子之篇當時一經目而品題何于此而遺旂無乃身險阻而備嘗口嚼嚼而情言不自我後孰開其先但無赤壁之筆終有愧於坡仙○參議常熟王鼎詩四首古維此景自天開涉險龍門亦易哉老樹懸崖幾幾變奔流石日千回米甍當日曾端拜白何年得再來俗客此行幾誤我夕陽未可放傳盃○金堂玉室人間世仙界誰能得須知萬疊浪花寒捲雪千般石窟暗藏春一時冠蓋日今日滿眼江山非昔人對此不須重感既商華周鼎亦埃塵○殘山賸水知幾幾此險日然大未工梓石障山分變態驚濤飛瀑欲爭雄千般鳥道空撐漢八節龍門亦下風咫尺黃州原不到浮雲飛鳥恨坡翁○夢中昨夜有龍門此險真應出世氛東去亂波蒼下峽西來孤嶂欲生雲地形自信超千古天巧誰能闕一分有約春風携酒去座中惟少沈休文○提學金陵沈鍾次前韻四首重煤冰滿畫圖開如此山川足險哉把筆倉皇詩浪押高閣傾回首頻回神翻石如人立天放飛流入地來

彷彿御風超八極滄溟何雷一浮盃○羅田山水真奇僻圖畫終看夢寐頻草樹周遭雨露乾坤閱歷飽秋春坡翁會欠  
留題句仙蹟還應解避人亟欲追遊拚命駕渴心安得免生塵○造化獻靈奇怪甚詩家放筆品題工仙凡平判彌千載情  
景相當是兩雄○白天才堪倚馬孟嘉醉帽或衝風山靈不省能知否此地相應著此翁○詩畫相將乍到門天然標格脫  
塵氛猶騎羸馬疲尋路直到深山踏破雲官海光陰嫌孟浪仙家境界乞平分品題畧不煩雕琢水上風行總是文○提學  
臨海蔡潮詩三首藻江石壁影蒼蒼欲記峯名問棹郎灘轉晴川如九曲水浮雲氣下三湘關情欲賦懷蘇老遊目難寬愧  
子長勝地吾人能幾到儘教新月伴歸航○泝流直探老龍池目駭心驚見此奇亦壁情遊潭小景瀟洲信有只如斯乾坤  
應許開雙眼山水相看若故知坐石觀瀾還載酒仙舟欲上更遲遲○一梁中截兩山連雲瀑飛泉幾窺穿深磬卻疑通禹  
穴長流應不比潮泉腔响影裏分三峽太極圖中會百川神斧何年平石壁新題許我得深鑄○同知王相一首勝地登臨  
幾畏難分明鬼刻一奇觀水從石竇流將去雲向峯頭散復橫赤壁鶴鳴聲已斷黃陵霜冷景殊殘爭如此段玲瓏玉快賞  
令人欲掛冠○推官朱節一首園苑徒聞遠世氛東南又見一龍門客懷淡淡宜秋景馬足登登破曉曉雲萬斛珠瓊天外墮  
一川風月淨中分莫言赤壁多奇勝應笑坡公負此樽○教諭陳瓚一首天河一脈暗相連險道縈紆萬壑穿瓊液飛流驚  
瀑布珠瓊錯落見潮泉導流神禹功存漢取水官尼意在川苔蘚百年封鎖地新題次第看磨鏤○逸民蔡芳一首風勁霜  
明行道難偷閑策蹇從遊觀恍疑三峽精神爽忽訝龍門毛髮攢萬斛  
珠瓊頻噴薄千尋雪浪不摧殘誰能收拾西山雨洗淨塵蒙縹緲冠

**白蓮河**

在縣南五十里源出崑山過本  
縣合新水關溪而出大江焉  
○按河見寰宇通志此缺見訂補

以上俱合流奉秦鄉河南遠縣治西下蘭溪為第二重襟帶者也

**平湖鄉河**

在縣北三十里源自鹽堆山西流壠狀河下與  
新昌十里合流出尤河營與官渡河流合襟

**西閣河**

在縣北  
七十里

**黃石河**

在縣北  
八十里

**地理志**

卷一

**九子河**

在縣北一  
百二十里

○按此春秋楚地鳩茲名之僅存者九資乃年  
遠音變太平寰宇記松茲即古鳩茲見訂補

**壠狀河**

在縣北  
八十里

**驟走河**

在縣北  
五十里

**新昌河**

在縣北  
七十里

**尤河**

在縣西  
三十里

○按此見元豐九域志作流河華岳北征錄  
作西流河今說作油河作溢流河見訂補

以上俱與平湖河合流尤河紫會官渡河流注之江遠縣治之後而為包絡者也

**石原河**

在縣北七里遠縣治  
之後而為包絡者也

**曾家阪**

在縣西  
七里

**庫泉阪**

在縣西  
十五里

**梅店阪**

在縣東  
二十里

**童家阪**

在縣北  
二十里

石橋阪 在縣東二十里 ○按作二十里未合當  
即舊之石橋鎮 是五十之譌見訂補

舊縣阪 在縣東六十里  
即舊之縣治

羅家阪 在縣北  
一百里

鴨子阪 在縣南  
五十里

衝

長園衝 在縣西一十里地勢  
廣遼溪流如帶故名 ○按此有誤長乃茶字  
音近傳訛見訂補

七楊衝 在縣北二十里有隱翁居此樹七楊於門故名有詩一絕云門栽曲  
綠數株楊春到清陰覆上堂花逐東風圓卻碎條濡朝露弱還強

七庫衝 在縣東  
三十里

紫檀衝 在縣北  
四十里

林

柳林二 一在縣東北三里一在縣東北五十  
里盧郡守濬詩云日色關林口是也

楊林 在縣南  
四十里

# 地理志

## 卷一

井

五龍井 在縣東歲旱  
騰雨則應 鄒家坳井 在縣東  
六百步 ○按此可据以訂後來  
諸志之訛見訂補

及泉井 在儒學門東教諭  
陶清臣已亥年鑿

石井 在縣東北  
二十里

龍井三 一在縣東北多雲鹽堆河去縣一百五十里一在鶴  
皇峯去縣一百里一在多雲山去縣一百六十里 玄妙觀井 在縣南百步盧郡守濬詩  
云一井新開浸碧天是也

潭

烏馬潭 在縣西 ○按此潭按以後志及大清一統  
志尚有缺佚之古蹟見訂補

蒲潭 在縣西北二十  
里舊有業甲

芭茅潭 在縣北六十  
里舊有業甲

天井潭 在縣北六十  
里舊有業甲

泉

玉泉 在縣西北十五里其  
泉靜練如玉故名 鳳坡泉 在縣西新街  
社學之東 ○按此可訂後來諸  
志之訛見訂補

玉虹泉

在縣東五十里宋紹興何錫汝石刻詩云百尺雲巖佛閣前曉鐘疎葉思悠然岸邊酌酒和清露石上題詩染翠煙半嶺泉鳴通古澗數峯秋盡隔寒川西風似欲吹人起去逐騎鯨汗漫仙○無名氏次韻玉虹飛下翠巖前便

似廬山瀑布然無復危亭如往日空遺斷礎迥輕煙泉聲自是○按此石刻詩作者姓名諸志皆誤應作王汝錫舒城鳴千古險語何嘗墜百川鼓岳載歌聊注月高風尚憶子喬仙○人湧幢小品說尤異又泉名亦載輿地紀勝見訂補

灘

胡師灘

在縣東十里

港

神仙港

在縣西北七十里舊說有神仙寓此遺有盤跡

溝

老虎溝

在縣南奉泰鄉一十里

城郭

城郭之立蓋古人重門待暴之意也羅田僻在萬山之中為淮豫兩路之喉舌草寇時發不有城以守之則民將肝食矣然圯缺之患無歲無之使修葺之功不繼則頽敗日滋而後益難於為力長民者其念之哉

○按宋舊縣城為創縣縣令魏任修此缺見訂補

成化己亥信陽衛軍入境規庫知縣沈雷築土城

周圍五里徑二里高一丈厚五尺開東西南北四門東北依東嶽廟山正北西北俱在山巔西南正

南東南正東俱臨河

地理志

卷一

嘉靖庚寅土城覆于水患賊復入寇知縣勞樟築石城

延袤以舊城為限高一丈五尺厚一丈立四門東曰崇仁南曰崇道西曰崇義北曰

崇德知縣沈越恐臨河一帶終不免於水患乃督民植楊柳以為防至今民感之戊戌羅大水四面城復于隍者過半祝侯將沒官盜產申准巡撫計丈給價募民修築完日登記冊籍以便日後因方照名修整

論曰勞侯之有功於羅厚矣而其功之偉莫大於修築城之二端而築城之功尤其卓然者蓋今之興作有三難費出之官則上疑出之民則下謗一難也視官府如傳舍不以爲已事而忠謀之二難也斷不由衷則沮之者多而事罔克濟三難也當官者多憚於興修之務廢不舉不舉率由是日有如勞侯者不亦鮮哉繼是沈侯祝侯皆能成公之美者故並書之

坊鄉

縱橫于城中者曰坊部分于郊外者曰鄉然皆不出于邑之城中焉羅田之鄉有三而坊僅有其名無創建者或以人或事或以地各有義存焉因並志之

進士坊

在縣東

政平坊

在縣南

惠義坊

在縣西

足食坊

在縣西

咸寧坊

在縣東

樂善坊

在縣東

仁和坊

在縣東南

育賢坊

在縣學東嘉靖辛丑知縣祝瑒建今廢

崇教坊

在縣南

歸厚坊

在縣東南

崇文坊

在縣南

以上在城中者

三鄉

平湖鄉

在縣西北

奉泰鄉

在縣東南

多雲鄉

在縣東北

市鎮

古者日中交易所以致民而聚貨也羅之溪流關狹舟楫不通雖無四方之商百貨之萃而一邑之日用所需內取之土產外通之竹筏其物亦多矣苟非定其法平其價未有不敗爭者此市鎮之所以志也

縣市

居民環列業商賈者權量任情高下各行司市歷年未更每值客商交易把持物價平民艱於用急價實僅得所值十之五雖設時估亦未能如之何此有司所當釐正而痛革者嘉靖辛丑知縣祝瑒照坊置立定所較勘權量

民甚便之

地理志

卷一

十一

正街

在縣東

河街

在縣東南

新街二

一在縣東北一在縣西北知縣夏國孝開

歸厚巷

去縣治三百步

河街巷

去縣治六百步

崇文巷

舊名詩書街去縣治三百五十步

橋頭巷

去縣治二百五十步

新街巷

去縣治四百步

黃家橋市

在縣東六里

平湖市

在縣西四十里

石橋鎮

在縣東南五十里舊有巡檢司今廢

○按此有傳說當是未立縣以前之石橋茶場官署見訂補

多雲鎮

在縣東北一百二十里有巡司

風俗 相傳為風相染為俗風俗之移人甚易而變之甚難羅之俗素稱淳厚而○按此於歷朝及明代其趨漸不如古不乘其未甚而亟反之則流弊益滋矣是深望於民牧者

秀民樂於為儒而不輕釋其業見神光觀記

土風厚善見蘇軾跋韓魏公詩

毗俗富庶見宋關詠神光觀記

淳質儉約見隋志

風氣和平訟獄稀少見秦觀謝表

尊德樂道其士朴而不陋亦見蘇軾跋韓魏公詩○按以上引用前人書文義例未盡一見訂補

男事乎外女事乎內勤於教子拙於行商羅之民朴而風羅之土沃而瘠稱風沐雨惟知力農執輪操觚惟知勤讀陰陽醫卜之技皆所未能商賈之業咸無所事間有

歲時正月元旦五鼓陳茶菓燈燭拜祖先壽尊長其下序長幼羅拜已乃出拜親朋更相賀歲立春前一日出東郊而春求柔桑以供蠶夏依灌木以采葛又於秋冬之交有事於木綿亦女工之最勤者也

烏飯供奉有喪則否五月端午懸蒲劍艾虎於門作角黍相饋遺六月六日及七月中元日家置羹飯祀先畢集親隣共享之八月中秋至寒露復祭掃先塋如清明禮十二月二十四日以後各烹羊豕陳酒菓會親隣長幼守歲至二十八九日宰

豬羊制羹飯以祀先除饋親友

地理志 卷一 十二

禮儀 本縣冠禮男子多以年二十上下為率惟從俗擇吉日而冠其循古禮而行之者僅兩見焉婚禮多從納采請期親迎之制但論財禮倫亡賴之弊亦多所宜懲禁喪禮多遵

律例做古制惟出喪日前二三夜隣友各携微饌坐夜或高歌吹唱或搬雜劇大於禮有妨至於散孝帛作佛事皆宜痛革祭禮歲時各隨家之貧富以為物品之厚而忌日誕日皆有常祭若墓祭掛紙則春以清明秋以中秋冬以歲暮也

橋渡 古人於農畢之時而成徒扛輿梁之制凡以免民之病涉也然羅田每於春夏之間則山溪之水泛溢洶湧其路之險而斷者常有橋其不可以橋者必有渡以通之或制自官或制自民皆與利也至於時察而

修葺之則端在良有司耳

通濟橋 在縣東成化初知縣徐泰建今廢

霸城橋 在縣南河街口今廢

板橋灣橋二 在縣西一座古橋一座義官程仲信建一座居民汪朝陽建

剪刀山橋 在縣西七里醫官張善建

覓兒橋 在縣西二十里義民胡明哲建

黃豎公橋 在縣東五里

段皮河橋 在縣東三十里民余志林建李正已重修

黃家橋 在縣東六十里

三里橋二 一在縣東三里一在縣西三里胡明智建

玉虹橋 在縣東四十里橋廣有  
何錫汝詩見玉虹泉 ○按何錫汝當作王汝錫此誤

祝家橋 在縣東十里  
判官胡祥建

觀音橋 在縣北四十里  
義民胡明智建

楊公橋 在縣北七十里逸  
民楊梓建有碑

石柱山橋 在縣北一  
百一十里

花石橋 在縣西北四  
里胡全建

關口橋 在縣南二里  
監牛張漢建

源清橋 在縣南一  
百五十步

河口橋 在縣北十里  
醫官張善建

李莽崖橋 在縣北二十里  
判官胡祥建

普西橋 在縣東  
二十里

地理志 卷一

石橋 在縣東  
十五里

普應橋 在縣西六十里  
見玄妙觀記

官渡河渡 有官舟  
見惠政

尤河柴渡 民有  
竹簾

塘堰 水利之興其來舊矣羅之田高者易旱必有防以障其流卑者易潦必有溝以洩其溢凡以備不虞也但其陂堰河防多失時不修故旱乾水溢之災人力終莫能勝因志之以俟專職者

蓮塘二 一在舊縣魁山南五  
里一在縣南五里

長塘 在縣北三  
十五里

官塘三 一在縣南三十里一在縣東南五十里一在縣東北五十里  
原係民地官登為衆防旱無稅每年止納造塘堰册紙價

石堰二 一在縣南十五里  
一在縣東五十里

千工堰 在縣北一  
百一十里

蕭家堰 在縣西  
十五里

羅田縣志卷之一



羅田縣志卷之二

食貨志

食貨生人之所急王者之所天也然土田異宜物產異品凡戶口之登耗貢賦  
盈縮徭役之重輕咸於是乎在司民牧者課農桑節丁力時徵斂則民生厚  
而理道得矣志食貨

土田

羅之土田酌原隰高下之勢為疆理溝洫之宜或上中錯或中下錯  
而貢賦有常國用恆足此吏茲土者所當隨時省耕斂思補助也

○按宋代土田有可攷者此未之及見訂補

高原田

六百二十二頃  
三十畝六分

下隰田

五百四十八頃四十  
三畝一分四釐二毫

官民山桑地

一頃八十  
一畝九分

官民麥地

五十四頃八  
十九畝二分

官民菓豆地

七十一頃  
二十六畝

官民塘

一十七頃八  
十五畝三分

食貨志

卷二

十四

官民芝麻地

二頃九十  
一畝五分

官基地

七畝  
二分

官田

二十三頃六十九  
畝三分四釐二毫

民田

一千一百七十頃七十  
三畝七分四釐二毫

石灰山

一在縣東南四十里袁家山  
一在縣東北八十里封鹽河

物產

百物之產各因五土之性周禮職方氏所以詔王擾邦國者也羅之土簿水輕所產者皆日用之  
常品金貝珠玉奇花異卉珍禽怪獸皆所無焉用天因地揔節愛養之道莫切於此故志之詳

○此按

稻類

七十日種  
油粟赤種

大粒赤種  
黃泥種

黃粒穀  
紅桃熟

子晚穀  
香子晚

紅殼糯  
鐵腳糯

百日種  
雲南種

白花種  
脂頭種

三朝齊  
江南晚

珍珠晚  
桐子穀

馬鬃糯  
馬牙糧

四節穀  
瘦田種

烏風種  
麻占穀

望水白  
黑殼晚

紅節穀  
交秋糯

折二糯  
白殼糯

蓋草種  
柳條赤種

矮腳黃種  
烏三節種

水葡萄  
芭茅晚

鬚鬚晚  
老人藕

界下其  
占糯

食貨志

卷二

十五二

麥

三百零糯  
羊鬚糯  
類 大麥  
類 小麥  
類 早粟  
類 矮腳紅

蜜蜂糯  
黃瓜糯  
蕎麥  
苦蕎麥  
大寒粟  
殺子粟

小寒粟  
百穀粟  
下馬看  
九月寒

青管粟  
芋蒴黃  
硃砂糯粟  
毛穀粟

菽

類 大豇  
類 小豇  
類 紅毛老軍頭  
類 婆莫來

紅豇  
刀豇  
白毛老軍頭  
銅鑼槌

黑豇  
芝豇

羅裙帶  
雁來紅

蔬

類 黃蕪  
類 黑蕪  
類 芥菜  
類 花菜  
類 麻臘菜  
類 春不老  
類 蒜  
類 葱  
類 蘿蔔

白蕪  
龍爪豇  
兔兒丸  
西山豇  
蠶豆  
按此水經注巴山名之僅存者見訂補

茶河豇  
雞鑿豇  
六月報

青皮豇  
豬牙豇  
飯豇

麻

類 黃麻  
類 黑麻

白麻

窩菜  
窩苣菜

芹菜  
蕨菜

菓

類 梨  
類 棗  
類 栗  
類 藕  
類 蘭菊

李杏  
柑柿  
核桃  
慈菇  
牡丹  
芍藥

梅桃  
菱瓜  
木瓜  
櫻桃  
荔枝  
紫荊  
紫荊金

橘橙  
白果  
西瓜

菓

類 梨  
類 棗  
類 栗  
類 藕  
類 蘭菊

木瓜  
春不老  
蒜  
韭  
木耳

絲芋  
茄  
月光菜

芫荽  
黃瓜  
東瓜

菓

類 梨  
類 棗  
類 栗  
類 藕  
類 蘭菊

杏  
柿  
桃  
核  
慈菇  
牡丹  
芍藥

梅  
菱  
木  
櫻  
紫  
紫

橘  
白  
西

菓

類 梨  
類 棗  
類 栗  
類 藕  
類 蘭菊

杏  
柿  
桃  
核  
慈菇  
牡丹  
芍藥

梅  
菱  
木  
櫻  
紫  
紫

橘  
白  
西

菓

類 梨  
類 棗  
類 栗  
類 藕  
類 蘭菊

杏  
柿  
桃  
核  
慈菇  
牡丹  
芍藥

梅  
菱  
木  
櫻  
紫  
紫

橘  
白  
西

菓

類 梨  
類 棗  
類 栗  
類 藕  
類 蘭菊

杏  
柿  
桃  
核  
慈菇  
牡丹  
芍藥

梅  
菱  
木  
櫻  
紫  
紫

橘  
白  
西

菓

類 梨  
類 棗  
類 栗  
類 藕  
類 蘭菊

杏  
柿  
桃  
核  
慈菇  
牡丹  
芍藥

梅  
菱  
木  
櫻  
紫  
紫

橘  
白  
西

菓

類 梨  
類 棗  
類 栗  
類 藕  
類 蘭菊

杏  
柿  
桃  
核  
慈菇  
牡丹  
芍藥

梅  
菱  
木  
櫻  
紫  
紫

橘  
白  
西

菓

類 梨  
類 棗  
類 栗  
類 藕  
類 蘭菊

杏  
柿  
桃  
核  
慈菇  
牡丹  
芍藥

梅  
菱  
木  
櫻  
紫  
紫

橘  
白  
西

○按唐宋有茶產極盛此未之及見訂補

○按唐以後縣有斬竹斬篋笛竹此均佚見訂補

白楊

槐椿

黃連竹  
白草竹

紫竹  
苦竹

楊桐  
檉楮

松  
柏

桐子  
蠟

水竹  
貓竹

鳳尾  
虎耳

釋  
禾藍

芙蓉  
小葵花

紫荊  
紫荊金

櫻桃  
荔枝

木瓜  
菱瓜

木瓜  
菱瓜

木瓜  
菱瓜

木瓜  
菱瓜

鬼柳

柘

桑

斑竹  
叢竹

艾  
蓬

薔薇  
葦

石竹  
雞冠

石竹  
雞冠

石竹  
雞冠

石竹  
雞冠

石竹  
雞冠

石竹  
雞冠

羽

望春 雁 雉

毛

喜鵲 百舌 竹雞 水牛 黃牛

鱗

狗 猪 狗 猪 狗 猪

甲

蟹 螺 蚌 蚌

蟻 蠅 蠅 蠅

烏柏 梓 烏 柏

布 穀 布 穀

馬 羊 馬 羊

豹 豺 豹 豺

猴 狐 猴 狐

蟹 螺 蚌 蚌

椴 樟 椴 樟

燕 鷗 燕 鷗

雞 鴨 雞 鴨

野 狗 野 狗

蛙 蟾 蛙 蟾

地 鼠 地 鼠

鵝 鴨 鵝 鴨

鷹 鷂 鷹 鷂

雀 鴉 雀 鴉

貓 狗 貓 狗

蟻 蠅 蟻 蠅

蚯 蚓 蚯 蚓

食貨志

卷二

十六

藥

黃精 葛根

枳 椴 枳 椴

烏 藥 烏 藥

土 牛 土 牛

芍藥 天花粉 枳實 茯苓

薄荷 枸杞子 南星 艾葉

車前子 瓜 蔓 瓜 蔓

百 合 百 合

貨

石 菖 蒲 香 附 子

山 菜 蕒 白 扁 豆

山 查 桑 白 皮

紫 蘇 麥 門 冬

器

石 器 竹 器 陶 器 冶 器

桐 油 布

木 漆 漆 油

錫 漆 錫 漆

戶口 民者邦之本而王者之所天也然合於民最親而生人之命寄焉戶口之登耗未有不

洪武二十四年

永樂元年

永樂十年

永樂二十年

宣德七年

正統七年

景泰三年

天順六年

成化八年

成化十八年

以上戶籍燼于流賊之火無憑稽查故闕之

弘治五年

戶五千七百六十二  
口六萬八千五百二十四

弘治十五年

戶五千七百六十二  
口六萬八千五百二十四

正德七年

戶五千八百二  
口八萬二千四百五十

嘉靖元年

戶五千八百五  
口八萬一千四十四

嘉靖十年

戶五千八百五  
口八萬一千四十四

# 食貨志

卷二

十七四

嘉靖二十年

戶五千九百八十四  
口八萬一千二百二十三

貢賦

下之所供為貢上之所取為賦羅田貢賦皆自定額其久也奸弊日生而賦尤甚飛詭埋沒那移影射之弊甚有難以究詰者嚴其實謹其防是所望於良有司

○按宋仁宗嘉祐六年石橋

茶場買賣歸官歲計三萬四千八十貫詳夢溪筆談應入歲賦此缺見訂補

額

辦通共價銀一百四十三兩七錢八分

南北兩京藥味

一十七兩九錢五分  
四釐四毫三微五塵

歷日紙

共銀一十四兩三錢二分七釐二毫五絲

段疋

銀六十九兩二錢

軍器

原額銀六十一兩三錢四分五釐三毫八絲二忽五微嘉靖十二年加派銀三十八兩五錢二分五釐五毫

祥襖褲鞋

八十三副共價一百二十四兩五錢

皮翎

白硝鹿皮一百四十張熟硝帶毛鴨羔皮八十張狐狸皮一十三張翎毛一萬一千根以上俱辦于丁糧○活雁一隻活鷓鴣一隻活野鷄一隻以上俱出于獵戶

坐派物料

先年司法偏累附近府州縣故本縣坐銀七百九兩五分嘉靖二十年奉巡撫陸公杰通省均派止坐本縣銀三百一十五兩八錢一分

夏稅秋糧

官田一畝折民田四畝每畝科米三斗二升三合六勺四抄七撮一圭八粒每畝科租絲六分共一十二斤一十兩一錢七分○官麥地一畝科麥三升二合一勺每畝科絲二錢共該絲一斤一十兩四錢六分○官

農桑地每畝科桑絲四錢共絲一兩八分○官芝蘇地每畝科米八升三合五勺○官塘每畝科米八升一合三勺五抄○民田每畝科米八升一合三勺五抄二撮一圭○民麥地每畝科麥三升二合一勺每畝科絲二錢共絲六十六斤一

十五兩三錢八分○民農桑地每畝科桑絲四錢共絲四斤七兩六錢八分○民粟豆地每畝科米三升二合一勺○民芝蕪地每畝科米八升三合一勺○民塘每畝科米八升一合一勺五抄二撮一圭

洪武二十四年 官民田賦八千九百九十七石二斗六升一合○夏稅大小麥一百二十六石七斗六升隨麥絲七十斤一兩三分該織絹五十二疋二丈七尺三寸三分

成化元年 開墾民田賦一石三斗一合六勺三抄二撮○夏稅大小麥一百七十六石二斗九合九勺

弘治五年 官民田賦一萬一千一百二十二石九斗五升二合五勺六抄○夏稅一百七十六石二斗九合九勺隨麥絲八十一斤三兩九錢八分該織絹六十四疋二丈九尺九寸三分

弘治十五年 同前

正德七年 同前

嘉靖元年 同前

嘉靖十年 同前

嘉靖二十年 先嘉靖十三年知縣沈越陞開墾米一百五十七石七斗五升通前官民田賦一萬一千一百六十三石七斗八合五勺六抄○夏稅同前

本縣田畝依山臨溪去石伐木開闢成田初年山高水深田腴而賦不覺其重既而生齒日繁流集日衆專以種山爲事緣土輕水重推蕩砂礫壅塞河道堆壓舊田故民納無田之糧而卒流亡矣嘉靖癸未知縣沈越親臨探踏得水災田糧一百五十餘石外訪得山谷中又有新開糧畝丈量陸科以補水災之數申明撫按不與開豁准折而反將新開爲實徵民益受害越深以爲憾

歲用

### 食貨志

卷二

十八五

一年之用

歲貢花紅酒席帶銀六兩○春牛物料並迎春彩仗酒席門神桃符共銀二兩三錢○新官到任祭祀每員銀一兩一錢○到任陞遷去任公宴知縣銀四兩縣丞主簿典史各二兩○各項造冊紙割筆墨銀一十二兩○歲季考試生員試卷茶食激賞花紅紙張筆墨湖望並上司接臨講書勸賞生員紙張筆墨各衙門棹圍坐褥硃盒筆架迎送上司傘轎兩具右四項銀兩多寡難以逆計俱候隨用查支註銷

三年之用

應試生員花紅酒席盤費新舉人花紅酒席舊舉人盤費酒席右三項銀兩俱候每年會計酌定其數隨年帶徵

五年之用

舖陳上等一副價銀一十二兩每年派徵銀二兩四錢中等二副價銀一十兩每年派徵銀二兩下等三副價銀九兩每年派徵銀一兩八錢

雜用

朝觀盤費腦刀造冊紙割扛解正佐官銀二十五兩首領官二十兩無官應朝吏給銀二十兩隨官應朝給銀一十兩脚力銀一十五兩吏一十兩造冊紙割扛解銀六兩○新官衙牌物件知縣銀一十二兩縣丞主簿典史各八兩教官五兩○部運南京倉糧官盤費佐貳官銀一十五兩首領等官十兩○部運兌軍糧官盤費銀一兩○本縣造冊書手三名佐貳官各一名每年每名工食銀六兩○本縣日用心紅紙割筆墨並六房吏公用紙割本縣日用並辦送上司按臨刑具右二項銀兩俱隨用登記逐月查支註銷

鹽鈔課程

洪武二十四年本縣帶辦稅課諸色鈔一千一百三十三貫三百一十文閏月鈔二十七貫七百文共該鈔一千一百五十九貫九百一十文嘉靖二十年實征男婦七千五百五十一口共折鈔四萬五千三百貫無閏月每丁口起運每留鈔連扛解共征銀一分五釐二毫四絲二微二塵二纖九渺共銀一百一十五兩六分三釐六毫八絲二忽五微七塵一纖三渺有閏月每丁口共徵銀一分六釐五毫一絲二微四塵一纖四渺共銀一百二十四兩六錢五分二釐三毫二絲二忽七微八塵六纖六渺此鹽課簡易之法民甚稱便

商稅

帶辦門攤商稅鈔四百六十八貫四十分  
官房基地稅 每畝科租錢實鈔官房九十七間實鈔一百一十六貫四百文

**驛傳** 除沒官重租並優免外實在每米一石徵銀一錢二分七釐三毫共銀一千一百三十八兩六錢六分三釐三毫  
三絲共編水馬夫一百七十九內除濟川衛水夫並各驛上中下馬夫不派過關外其餘驛遞水夫革去原議省  
存名色每夫工食扣存過關銀六錢行令驛遞官吏照  
數徵銀以備應付支用填註格限文簿季終齋府查考

**川濟衛** 馬船六隻水夫永充一十五名糧食七十三名每名朋米三十  
五石七斗四升每名每年該徵船料工食銀四兩五錢五分

**蕪州遞運所** 馬船一隻水夫糧食三十名每名朋米五十七石四斗四升每名每年該徵船料補陳什物修船工  
七兩三錢一分二釐一毫一絲一忽○紅船一隻一分水夫糧食一十六名每名朋米五十六石八  
斗四升每名每年該徵船料補陳什物修船  
工食銀七兩二錢三分三釐三毫三絲一忽

**蘭溪驛** 站船三隻半水夫糧食三十五名每名朋米五十六石一升  
每名每年該徵船料補陳什物修船工食銀七兩一錢三分

**襄陽府呂堰驛** 上馬一疋馬夫糧食一名朋米一百五十五石五斗八升每年該徵馬價補陳什物草料工食銀一  
十九兩一錢七分○中馬一疋馬夫糧食一名朋米一百五十五石五斗八升每年該徵馬價補陳什物草料工食銀一  
百五石二升每年該徵馬價補陳什物草料工食銀一十三兩三錢七分

**江夏縣東湖驛** 中馬一匹馬夫糧食一名朋米一百二十一石二斗八升每年該徵馬價補陳什物草料工食銀  
一十五兩四錢四分○下馬一匹馬夫糧食一名朋米一百五石二升每年該徵馬價補陳什物  
草料工食銀一十  
三兩三錢七分

**蕪水縣巴水驛** 上馬一匹馬夫糧食一名朋米一百五十五石五斗八升每年該徵馬價補陳什物草料工食銀一  
十九兩一錢七分○中馬二匹馬夫糧食二名每名朋米一百二十一石二斗八升每年該  
徵馬價補陳什物草料工食銀一十五兩四錢四分○下馬一匹馬夫糧食一名  
朋米一百五石二升每年該徵馬價補陳什物草料工食銀一十三兩三錢七分

**本府齊安驛** 下馬一匹馬夫糧食一名朋米一百五石二升每年該  
徵馬價補陳什物草料工食銀一十二兩三錢七分

### 食貨志

卷二

十九

**倉庫** 正賦倉 在蕪水縣巴河鎮石澗之濱成化初知縣徐泰買彼民地爲之正廳五間扁曰正賦左右倉廩二十五間嘉靖丙  
申知縣林宗柱重修未就嘉靖庚子知縣祝瑒修成所以便民水次南兌各倉本邑之貯蓄也門子二名地方一  
名皆羅之移寓于巴河者本縣知縣夏清勤有通判黃壽禁諭碑○知縣沈越因憂早喜雨留題壁間詩云飄風朝來  
雨意深新秋得雨如得金枯禾垂穗如在燭一雨土脈皆溼淫火龍戰退力不任祝融垂首空暗嗚嫩涼潑潑曉更侵  
無邊爽氣何蕭森有客苦熱正不禁蕭蕭數陣動人心江雷急吹噴清音誰人復作悲秋吟清風梳橫冠華簪恍如飛  
錫到雲林好携樽酒對壺琴此樂吾願常追尋○又詩一首信宿官倉夜情多景復臨雨昏煙樹暗江擁浪花深二稅  
當備日三農隱望心我  
來誠政拙未敢羨鳴琴

**便民倉** 在縣南一里知縣徐泰建所以便民貯存留稅糧者也嘉靖丙申知  
縣林宗柱遷建于縣儀門東以便守衛隨傾頽幸丑知縣祝瑒重修  
架閣庫 在縣正廳  
右一間

**徭役** 徭役民之職也然古之民未嘗以役爲勞而今之民則反以役爲病矣羅田有正役有雜役  
皆因其丁糧之多寡家之貧富而爲之重輕苟有司不加之意焉則不得其平而鳴者衆矣

**里長** 本縣原額四十九里成化壬辰知縣張運歸併作二十五里共二  
百五十甲每年一甲輪役而甲首因之戶有消長故十年一編

**甲首** 舊額五千七百五十五戶成化壬辰歸併作二十五里每里將消之人戶內稍有了糧者十戶填補格限其餘無  
糧者作時帶管嘉靖甲午知縣沈越新收附籍人戶一百七十九戶辛丑年點查實在有了糧者一千一十戶

**老人** 每里各役一人年終更替時估老人一名木  
鐸老人二名月給糧各四斗死則給以衣棺

里 納 十年應役之後二年收本里十足夏稅秋糧者也二十五里內又

皂 隸 本府四名本縣二十名縣丞主簿各四名典史一名都司一名布政司一名按察司九名

弓 兵 多雲鎮巡檢司一十二名舊三十六名知縣沈越申革今只十二名宜申復舊額

子 本府二名本縣五名布政司一名按察司二名

門 子 本縣知縣二名縣丞主簿典史各一名儒學三名布按分司府報各一名山川社稷邑厲壇各一名文廟明倫堂啟聖名宦鄉賢祠一名

庫 子 本縣一名儒學二名夏口驛一名山坡驛三名

斗 級 本府軍儲倉一名儒學二名荆府一名預備倉二名

馬 夫 按察司副使十名本縣知縣縣丞主簿典史各一十名

齋 夫 本縣儒學教諭 膳 夫 儒學訓導各二名 四名

防 夫 蕪州遞運所 舖 兵 七舖共一十一名 十三名

柴 薪 楚府工正工副四名南京錦衣衛二名本府經歷二名本縣知縣四名縣丞主簿二名典史一名

歲貢盤 躉 每年帶徵 油 燭 本縣十兩

### 食貨志 卷二

祭 祀 文廟二祭社稷壇二祭山川壇二祭邑厲壇三祭啟聖祠二祭名宦鄉賢二祠二祭

中下解戶 中解戶三名 下解戶二名

禮生屠戶 荆府三名

民 校 楚府六名荆府四名永新王府一名永定王府二名

進表人夫 按察司進表人夫衣糧銀七兩九錢一分五釐千秋表人夫衣糧同

大興縣富戶 三名正銀扛解共九兩四錢五分

本縣鄉飲二次 共銀一十二兩 便民倉老名

火 夫 一年一審每日輪流守夜不聽差遣總少甲一年一換

### 工匠

本縣各色人匠 鑼子匠四名伍墨匠十三名染匠八名毛匠十八名鑿匠四名船木匠三名缸匠一名絡絲匠五名雕鞍匠一名油漆匠十名瓦匠十四名紙匠二十名木匠二十一名印造匠一名油匠一名竹匠十名

名鐵匠十一名錫匠二名以上應南北兩京役刊字匠二名應本縣役

### 羅田縣志卷之二

羅田縣志卷之三

官師志

建官古也官之建凡以為民也今郡縣之制令以下之職尤為親民者詳其職制列其歷官別之以名官而勸戒之道寓矣志官師

職制

官制之來舊矣職守之與廢品秩之崇卑名稱之沿革歷代異焉因名而思義因義而修職志職制之意也

按職制前應有藩封一門如松茲侯等均佚即歷代職制此亦不詳見訂補

宋以京朝官知縣事其下有丞有主簿有尉各一員

本朝設官同止易尉為典史一員

知縣正七品月俸七石五斗掌總治民政學校農桑戶口賦役錢穀賑濟兵戎之事縣丞正八品月俸六石四斗掌清戎之政督勸農之事主簿正

九品月俸五石五斗掌催科勾稽簿書之事典史不入流月俸三石掌閱習弓手職奸禁暴

按此易尉為典史一語有誤見訂補

儒學教諭一員訓導二員

國初用儒士其後專以會試乙榜進士及歲貢之士為之月俸三石

多雲鎮巡檢一員

從九品月俸五石專以把截六關盤詰奸細巡捕盜賊為職

醫學訓科一員

以醫生之精其業者為之其屬有醫生五名專治藥餌以祛民疾也

陰陽學訓術一員

以陰陽生之通其術者為之其屬有陰陽生五名專以卜擇時日候更漏者也

官師志

卷三

僧會一員

以僧人為之專以統治禪流也

道會一員

以道士為之專以統治羽流也

設吏禮二房各司吏一名典史一名戶房分一科司吏二名典史一名兵刑工三房各司吏一名典史二名架閣庫承發司各典史一名儒學巡檢司各司吏一名

司吏月米

三斗其初由郡縣守令選用近年多以例納銀布政司而考選撥參則皆由臬司與巡按也其役專掌文書以三年為一考六年為兩考

歷官

歷官者何錄其姓氏其里居厥其行業其焯然可稱者既表而出之碌碌者亦不遺焉示戒也惡迹之彰聞者不別書存厚也噫可畏哉

按梁魏周等朝義州刺史官全脫均見訂補

宋知縣

按此前應有石橋茶場官尚有可考者又宋知縣尚有七八人可考又宋縣丞尚有一二人可考者又宋縣尉尚有可考者又宋學官尚有三人可考者均見訂補

吳季益

弋陽人

本朝知縣

按嘉靖以前尚缺四人見訂補以後亦有五人可補

詹魯山

按此另有考見訂補

唐玄

按另有考見訂補

元知縣

按此前尚有達魯噶齊可考見訂補又元縣尹尚有三人可考見訂補

石璞

按此籍貫出身全脫見訂補

陳琦

浙江紹興人

王昇

按此籍誤見訂補

周廣

山東鄒平人

張儀

行實見名宦



羅如 江西南昌人 監生

龐敬 浙江嘉興人 行實見名宦

陳鼎 廣西慶遠衛人 行實見名宦

王恕 江西廬陵人 舉人

段容

張暹 雲南人 ○按此籍與出身均脫見訂補

徐泰 直隸江陰人 舉人行實見名宦

余洪 直隸六安人 ○按此名誤行實見名宦 見訂補

陳德成 福建長樂人

沈雷 直隸華亭人 歲貢卒於官

王璣 山東人 ○按此籍脫見訂補

羅勳 四川永川人 進士以陞去行實見名宦

楊琦 浙江鄞縣人 舉人

康紹儒 順天宛平人 舉人以事去 ○按此籍誤見訂補

蕭英 江西新淦人 舉人 ○按此名誤見訂補

夏雷 浙江歸安人 舉人卒於官

殷佐 山東高唐人 舉人以事去

章式 江西臨川人 舉人以事去 ○按此名愉乃惟誤見訂補

張愉 四川南充人 舉人以改調去

周英 四川忠州人 舉人以事去

夏國孝 四川涪州人 進士以陞調去

鄒明魁 四川資中 舉人以事去 ○按此籍誤見訂補

勞樟 浙江崇德人 舉人以事去行實見名宦

沈越 南京錦衣衛人 進士以陞調去行實見名宦

官師志

卷三

二

林宗桂 福建閩縣人 舉人嘉靖十四年任以憂去

祝珩 浙江蘭溪人 舉人嘉靖十八年任以行取去

本朝縣丞 ○按此官缺六人見訂補

沈俊 ○按此籍出身均脫見訂補

沈梅

王端 吏

魯瑄 ○按此全脫見訂補

龔岳 江西豐城人 吏員

徐紳 山東東平州人 ○按此出身行實見名宦 脫見訂補

李光祖 直隸六合人 監生以事去

何德洪 四川眉州人 監生以陞去

張需 四川乾維人 ○按此籍誤名亦誤見訂補 監生以事去

蔡維禎 直隸盱眙人 監生以事去 ○按此名誤見訂補

惠玘 河南商水人 監生以事去 ○按此名誤見訂補

章文憲 直隸舒城人 吏員以事去

吳彥翹 四川人 監生卒於官

嚴鍛 浙江烏程人 監生以事去

宋主簿 ○按此尚有一二人可考見訂補

義興 ○按此以地名誤作人名見訂補

元主簿

可立 ○按此誤以一人名為二人見訂補

吉思 ○按同上

本朝主簿 ○按此官缺五人見訂補

田道 貴州石阡人 行實見名宦

冉珣 四川瀘州人 吏員以事去

邵宣 ○按此全脫名 亦訛見訂補

江鵬

陸敏 浙江烏程人 行實見名宦

淡觀 ○按此另有 考見訂補

覃添錄

翁勉 浙江人 監生

張時瑞 雲南人 吏員以事去

胡紳 陝西人 監生卒於官

崔權 監生以 事去 ○按此籍脫 見訂補

齊銀 河南臨漳人 行實見名宦

李儁 雲南大理人 行實見名宦

邱鏗 浙江鄞縣人 吏員

宋典史

史季瞻 ○按宋無典史一官史乃以 尉兼簿者此官誤見訂補

吳仁傑 ○按此大誤且 多脫見訂補

元典史

鄔世榮 ○按此姓誤 見訂補

本朝典史

虞俊 山東濰川人 行實見名宦

溫仁

遂聰

蔣昇 壽州人

李唐

官師志

卷三

王弘道

何耀 廣東順德人 吏員以致仕去

王環 福建人 吏員以事去

程勉 河南泌陽人 吏員以致仕去

梁冀 四川巴縣人 承差以憂去

彭仕演 福建福清人 吏員

元教諭 ○按元教諭尙有二 人可考見訂補

廖王佐

蔣翹之 江西廬陵人 舉人 ○按此朝代大 誤見訂補

本朝教諭 ○按此官缺四 人見訂補

曾宜勉 江西廬陵人 舉人 ○按此有誤 見訂補

何明 浙江人

錢休 象山人 ○按此出身 脫見訂補

章瓊 廣東欽州人 監生行實見名宦 ○按此出身 誤見訂補

陳璉 江西南昌人 舉人以 考滿去行實見名宦

陳訪 直隸桐陵人 舉人 正德辛未經流賊深入 之變逃竄山谷艱苦備至賊平後遂請老

○按此籍誤出身 亦誤見訂補

陳璿 福建懷安人 行實見名宦 ○按此籍誤 見訂補

崔見賢 直隸揚州人 監生以事去 ○按此另有 考見訂補

徐衢 四川越雋衛人 監生以陞去

曾嘉慶 江西泰和人 舉人 嘉 靖八年任以陞去

陶清臣 浙江泰順人 選貢 嘉靖十五年 任以憂去行實見名宦

楊鸞 廣西桂林中衛人 舉人 嘉靖十九年任以陞去

蔡元偉 福建晉江人 舉人 嘉靖二十一年任

本朝訓導 ○按此缺五人見訂補

葉琳

葉春直隸穎州人

○按此有脫誤見訂補

吳承宗福建莆田人

○按此出身佚見訂補

袁英浙江常熟人

○按此省訛出身脫見訂補

李勉江西廬陵人

○按此籍誤見訂補

胡學儉江西泰和人

○按此姓誤見訂補

朱鑑象山人

○按此另有考見訂補

石彬浙江天台人

○按此名誤籍誤見訂補

陳誌浙江永嘉人

○按此名誤見訂補

張佑河南固始人

○按此名誤籍誤見訂補

姚璿河南鄆州人

○按此名誤籍誤見訂補

韓鏞直隸桐城人 ○按此籍誤見訂補

趙廷佐廣西桂林中衛人

鄧穆江西吉水人以陞去行實見名宦

馬順四川定遠人

郭愈華江西龍南人

孫本淑四川璧山人

洪炯直隸歙縣人

黃念珠四川邛州人

蔡芳南直隸邳州人

官師志

卷三

四

名宦

○按宋元明職官可列傳者甚夥其總部州府巡歷之名官亦然此均無之見訂補

元知縣

周廣弘農人大德甲寅自魁山下遷縣官渡河以就民衆邑人賴之

本朝知縣

張儀山東鄆平人由舉人廉而有為惠而無費民深懷之

王昇紹興人由進士律身廉謹卓有惠政

龐敬浙江嘉興人由舉人蒞政嚴明民皆畏服壇壝祠廟煥然一新

陳鼎廣西慶遠衛人由解元治民寬恕卓有政績至今民懷其德

徐泰直隸江陰人由解元居官清白仁恕俸祿自供費外盡貯於公四郊俱創便民倉以爲凶荒賑貸之備買斬水

碑記茲不重書所在公館壇壝率植棗柏等木衆芳垂蔭民有甘棠之思成化四年黃郡七邑耆庶相率奏乞申郡疏進未下都御史吳璽嘉其政再以疏

聞陞知荆門州百姓攀轅莫留哭聲振地乃立去思碑議者比漢循吏云○尙書錢塘倪謙碑記云心之官則思思者感物而動者也夫人有受人一飯之恩百金之惠者尙感其德而思之不覺况乎推一視之仁徧百里之邑使其家給人足俯仰畢遂其德在人渝肌浹髓豈直百金一飯而已哉詩曰有斐君子終不可諼兮是宜思慕之無已也黃之屬邑有羅田焉成化元年

詔以江陰徐泰士亨來知縣事士亨景泰丙子京闈發解第二人也學有源委而存心仁恕立志遠大其得縣為治遂以  
夫不獲為己責視蒙之初首與神陸誓曰政事未備神其默相意政奸貪神其降殃故其蒞官臨民廉慎自持克勤撫字  
格盡乃心一本於誠凡百有為皆可質諸神而無媿是以扶善抑強濟貧卹患阜民為先勸農為急貧無牛種者官為給  
之助其耕藝與學校以振士風厚儲蓄以備救荒置義塚以掩骼斃屍膏大飢發粟以賑有創損廬瘦不能負粟者捐已  
俸廉倡率邑之富民輸米芋為粥食之雖隣邑之饑者聞風來乞食之而不拒活民不可勝計見男女不能備嫁娶之禮  
禁其論財悉令婚烟軍有本戶將絕而過繼他人戶者官為出價贖還俾承宗祀遺者聞之悉還復業免其徭役給官  
寬欺赦活之歸者如市有負租不能償者指理代其輸納豪右欺蔽田糧六百石餘產去稅存民困輸賠士亨精算法  
田以存之罪嚴清理之格有田則有糧據糧以尋田田在而糧清賦蔽者悉露而占田輸稅向之無徵困於賠債者皆脫  
然矣民安得而不思之哉士亨本江南富家任六載凡周身之給悉自家鄉釐至毫不取於民雖常隸從散遣務農而不  
入其工價其他善政未易枚舉是以德教大孚而人化之民無關很更不受遺里老胥徒耻言財賄成化四年士亨述職  
之京矣羣吏相率詣城隍祠拜誓曰不敢以我侯離任而受汚辱有犯者神責而衆共斥辱之是以圖虛刑  
措民心感悅親之若父母愛之若四體相與合七邑之人赴京保為郡守不報都憲吳公琛巡撫湖廣奉

敕考察推其德政為諸縣第一用辛酒織文彩聯褒勞之績  
聞於朝遂有荆門知州之擢去任之日帑溢於庫粟盈於庾持數印封加於始倍莠扶旄旌號泣處地為之淫攀留者塞  
道出境度不可留則脫其草機置之神廟以示不忘其得民之心可謂深矣故侯既去而衢童壤叟耕夫饑婦飲食必思  
相過於途則必更相謂曰安得我侯復來撫我哉思慕不已更相謀曰易若紀去思之實於真珉哉於是老而八十者民  
廖浩等道達衆志遠來謁文歸刻於石孟子曰民之歸仁也猶水之就下獸之走曠言仁之感人其易若此今觀士亨致  
羅氏感悅思慕而愈久不忘者豈非一仁之所及哉可書也已昔劉寬平陵而去百姓攀車拒輪崔瑗分汲遷秩男女為  
碑頌德此古之循吏垂休前史者也今復為士亨見之又何讓於古人哉予用  
是記之以示後既以恩羅民情又以為令者勸也傳循吏者尚當有考於斯文

**余 洪** 直隸六安州人由監生幹而有守平  
易近民終以直道去任士民惜之

**羅 勤** 四川永川人由進士鎮靜寡慾幽冥不欺布帛之衣  
九載不易有古人風尤敬教勸學士民至今仰之

### 官師志

卷三

五

**勞 樟** 浙江崇德人由舉人先任萬年知縣以不吐骨鯁左調羅田嘉靖庚寅抵任適地方凋弊之後吏胥舞文之秋  
及僅半歲而屹然峻起鐵耳有諸金玉有韻即其才力所運天下之事無足為者且其見之明守之定理所當行而力可  
城者輒為之知復疑畏雖上司或有不允必確然自信直行己志而後已終不見其委曲逢迎之態人以是益嘆服壬辰  
廉以母制歸童叟號泣載路隨立公去思碑矣○御史崇陽吳澆碑記云羅田黃之屬邑襟帶淮豫僻於萬山之中方伯  
春訪庶務以符移集事越數年一臨之中丞柱史歲事委於郡邑長貳曠無策厲民皆困於時斂畸零之耗五倍於恆典  
十年輪役衆寡大小無由取平役未旬月連身者往往兼城郭圯壞庠序頽墮俎豆絃誦委於荆棘而士業荒矣已丑春  
試事西臺與玉泉張希程談而傷者久之夏一齋勞侯出尹於羅視篆首清國計以祛民困京運藩祿官俸軍備精酌而  
輕重之微至圭撮必手操盈縮而府衙能衙奸民之所輸較昔僅十之六而會斂者不敢過則上得濟於公其餘無經  
之費十損其五徭役編造即願役差役酌丁糧相值其尤重者公供以贍之一夕而定民罔異議歲計聽支國有定額上  
下相蒙重科影射者多候鈎考得七百餘兩仍以貸一年正辦里甲支應日率一錢以貯於官者給之有餘留備賑日會  
括月費不及百錢故幣獨不能立與童伏巖谷者持糗駢肩其來如堵閱役而歸歡聲野震矣南陽光息之盜素雄南楚  
庚寅冬壓境突入盧邑遠遁舉數十家燎為瓦礫民情惻傷如狂侯謀成石城為久安計議初定上下難之侯奮然振敵  
繩丈約費刻期順工命徒則給公餘之費操嶺登石計塊為塔分隲責成日三巡閭夫則以里之退役者戶共一役除以  
城居之民計家助之故力不殘於繚緇而募者起阜裕之家未五月巍然樓觀岌岌而立而延袤數百丈女牆鱗次壯於山川  
引控之中達之藩臬捐俸以為神算廟學久廢議以淫祠之毀千餘兩猶慮工浮於費無敢任其咎者侯決志相繼具舉  
責之古符章少尹文憲時省試之以總其成議儲未罄而殿廡堂舍亭榭煥然與城相麗少參常州吳公按節還視撫膺  
曰誠經世之奇男子也生員董正胡大亨者民蔡芳等稽顙欣躍以告曰侯清儉自持真實愛民不粉飾以要譽不僥倖  
以希進元德元功允在民心將勸以金石庶垂永久吳公  
曰俞歲乙未歲青朱祿走幣南畿因張玉泉求以記之

**沈 越** 南京錦衣衛人壬辰進士羅人於初見成慮年少而分尊於民必不親三月後乃見巨量能容清節不忒巡撫  
嘉其雅健侍御稱其清勤多委任之演武修文黜邪崇正事有條理尤加意學校尋調平江士民保留弗得公  
以未能為民成開荒抵水災事為憾後考滿過  
巴浦羅之黎老爭趨百里外送之相泣而別

本朝縣丞

徐紳 山東東平州人由監生任縣丞佐政有方剛介自守遇

恩例告回養親民留之不得成思慕之

本朝主簿

田道 貴州石阡人由監生任主簿綽有能聲兼攝麻城廣濟縣事並著能譽互相薦留不果去日囊無餘資

陸敏 浙江烏程人由監生居官不以家累自隨廉慎有為徵租得體王分巡稱歎所屬惟見此簿歷任五年以禮致仕民深德之

齊錕 河南臨漳人由監生恬淡古樸耿介勤慎署新水縣事一廉自守吏民不敢欺

李儵 雲南大理人由監生嘉靖己丑來官不携家累世利淡泊而節介愈堅徵科不峻而賦稅咸集公退之暇彈琴賦詩自適嘗以明道先生春日偶成詩冠篇首而續和之其志亦高尚矣嘉靖甲午冬例應

朝冬郡縣官已先期啟行當道議公朝觀檄後至民皆為公愛其無備也公即日匹馬長行無所顧慮不幸卒於京士民情之嘉靖丙申已奉

旨入祠矣

本朝典史

虞俊 山東淄川人由吏員在任九年守而有為民保留之復任九年至今稱頌

官師志

卷三

六

本朝教諭

章瓊 廣東欽州人由舉人學行俱優教有成績陞湖州府判

陳璉 江西南昌人由舉人謙和律已平易與人講解詩書淵源有自力黜浮靡潛心理學嘗與陝西文衡時稱得人九載陞鎮江通判

陳璿 福建懷安人由舉人為教寬嚴相濟博學多聞尤味於詩邑之風景題詠殆徧其所著有易經備采一書提學浦川張公邦奇以奇才目之旌舉擢崇義令

陶清臣 浙江泰順人由選貢待士有恩蒞教匪懈俸廩之出納甚明侵漁之宿蠹盡剔出資以治官寓捐祿以給考供遠問同官之疾而復周其喪素篤同寅之雅而不計其犯以愛去士人懷之

本朝訓導

李勉 江西廬陵人由歲貢誨人有方耿介不屈士子思之

石彬 浙江天台人由歲貢處已待人內外如一教有成法詩文俱優得古人風卒於官臨終謂其子簡曰此其所以為君子也意必常有戒之箴故如此猶致叮嚀云爾至今士民仰之

張佑 河南固始人由歲貢存心光大施教嚴勤後陞南皮教諭士多敬之

鄧穆 江西吉水人由歲貢愛士以公而去取尤嚴臨財思義而取與不苟文黜浮薄學本正宗五年陞諭善化士子不忍捨

公署志

公署者官僚視事之所也其規制之廣狹則隨品秩之崇卑以為隆殺欲其稱也

羅田公署自郎官以下與凡行署公館以及郵亭之屬莫不各飭其居所以爲一方之觀望備矣故志之詳

○按此於宋元公署均缺見訂補

縣治舊在魁山下洪武間知縣周廣遷今官渡河創建廳堂學舍幕廡成化乙酉知縣徐泰因廢重建正嘉二廳弘治辛亥知縣羅動重建儀門正德丁卯知縣夏雷重建後堂壬申盡燹於流賊知縣殷佐張愉相繼建立嘉靖甲午知縣沈越林宗桂相繼重修辛丑知縣祝珣重建東廳增廣吏舍

○按洪武二字誤

正廳

三間知縣張愉扁曰牧愛

東廳

三間知縣祝珣扁曰退省

幕廳

三間

東西司房

一十架閣庫

知縣

宅

在縣東

縣丞宅

亦在東

主簿宅典史宅

俱在東

吏廨

東十間西十三間

戒石亭

在縣廳中道

便民倉

一十五步

儀門

三間

縣獄

在儀門外之左

譙樓

在縣前儀門外二十五步正統八年知縣龐敬建正德戊寅知縣張愉修

嘉靖丙申知縣林宗桂扁曰大觀樓

其界譙樓外東自按察分司右西

延二十三丈前自大衙後距鳳山頂袤八十一丈

距急遞舖左延六丈譙樓內東自監房西距龍亭庫

延二十三丈前自大衙後距鳳山頂袤八十一丈

申明亭

舊在縣治按察分司之左

旌善亭

在縣治譙樓外之左知縣勞樟建亭內書善人胡明性名第一

陰陽學

舊在縣西一百二十步嘉靖丙申知縣林宗桂改在儀門外之東

### 官師志

卷三

七

醫學

舊在縣西一百二十步嘉靖丙申知縣林宗桂改在儀門外之西

僧會司

在縣東塔山寺

道會司

在縣南玄妙觀

巡檢司

在縣東北一百二十里衙門久廢嘉靖辛丑知縣祝珣改廢寺爲之

府館

在縣東一百二十步延六丈袤五丈○推官羅勳留題壁間云竹簾花蛇此最宜綠毛龜產水之涓我來物物不教借

歸依石壁鷄聲茅店隱松坡也知天下本無事其奈庸人自擾何○同知夏廷芝詩云大河近邑繞前灣返照流輝映遠山

盧雁寒鷺極浦外草蟲聲寂破籬間石田雨過農收穫紅樹經霜錦作斑地圃村秋有望疲瘵幸得一開顏○通判毛應

布政分司

在縣西一百步延四丈袤一十八丈嘉靖丙申分守韓公瓊扁其堂曰紫微行署知縣林宗桂立郡守盧天台

何處桃招搖塞西郭○垂雲採香齊踏雪拾亂梗救命是生涯不照溪邊影○北風吹我離明月穿我屋兒女對愁看何日問金谷

按察司

在縣東一百步延八丈袤一十三丈嘉靖丙申分巡周公在扁其堂曰一方

舖舍

縣前舖

舊在府館之左延袤左右抵公館民居爲界知縣夏崎孝遷縣治西二十步知縣林宗桂重建

十里舖 南去縣十里河之濱舊在河東今遷于河西幫山知縣林宗桂建

長嶺舖 在蕪水縣界內

嚴家均舖 在蕪水縣界內俱知縣林宗桂重修已上往蕪水縣路

馬郁舖 東去縣十里在陶冶山之下

鳳凰舖 在鳳凰關東去縣三十里舊在葉家河今遷張尙文住基之右

石橋舖 在舊縣版即古石橋鎮地以上往英山縣路 ○按前山川中以石橋版舊縣版為兩地此又作一地未合見訂補

官師志

卷三

八

羅田縣志卷之三終

羅田縣志卷之四

學校志

儒學者育才之地也聖賢之功國家之用咸由是以出可不謂重乎志之重民教也社學則養之以進之於儒學者也法皆得書祭器圖書具載者俾勿壞也

儒學 ○按宋元儒學有可考者此缺見訂補

洪武乙卯知縣石璞于縣東歸厚巷遷

廟學於縣南官渡河之濱弘治辛亥水泛知縣羅勳復遷舊址嘉靖辛卯知縣勞樟

因圯壞殆盡重建庚子知縣神珣據生員呈請改就形勝一撤而新之

廟制 先師廟 五間舊名大成殿 東西廡 各五間 戟門 三間 石櫺星門 三間 泮池 一池 啓聖公祠 三間在明倫堂

名宦祠 在戟門之東 鄉賢祠 在戟門之西

敬一箴亭 在明倫堂之後知縣勞樟建

學制明倫堂 三間在廟後 兩齋 各三間在明倫堂前左曰進德右曰修業 號房 舊六間新建三間在西廡後

學校志

卷四

神廚 饌堂 高明堂 祭器庫 書籍庫 以上舊有今皆廢

教諭宅 在廟前東知縣勞樟重建知縣神珣教諭陶清臣重修宅後有高園園上有澄慮軒教諭蔡元偉建園後有古松一株訓導趙廷佐詩云亭亭挺挺上雲龍鐵幹銅枝未可緣風烈試聽哮虎嘯月明還見老龍旋

訓導宅 二宅俱在廟前西前後相接其後宅乃知縣神珣創置者也

先時學諭宅頽壞支撐以居陶公慨然視之如家事不靳費不憚勞捐俸資撤其朽而新之有司嘉其意而助之內外舍宇戶竈牆垣煥然改觀又鑿井泉以公僚友置二櫃以貯書籍思以遺利於後之人嗚呼其亦人之所難也已嗣是任者楊公鸞也思欲立石以尋陸野貽令未克如志予故繼志而書其端嘉靖壬寅晉江蔡元偉謹識

提學沈鍾遷學記云弘治丙辰九月既望有儒生羅田余大德胡大本同踵予門曰敝學賴古淪羅侯勳新遷告成敢以記請余退老林下頗稀聞鉛槧事懇辭二生竟致書於予予覽之始知其學蓋如書有廢有興云者庸即其廢興之故而言曰羅田學舊在邑東官渡河之漣比歲淫潦衝突棟瓦隨以漂沒弘治戊申羅侯下車初慨然咨嗟乃謀備教諭章瓊訓導朱鑑袁英廩膳生胡大倫輩冀一新之遂申請諸當道僉可之爰擇邑之歸厚巷境勝而龜吉輒市材鳩工凡百費悉勸助於多資而好義者之室一無所侵於民撤義民胡月臨周文鄒榮富永瓚胡大剛程仲信黃學洙胡大韶董文經始於辛亥二月訖工於十一月維時大成殿東西廡戟門櫺星門與夫明倫堂兩齋膳堂號舍之類罔不蔚然就緒聖賢肖像一皆備然其中此其學之廢興之故有若是者傳曰不有所廢焉有所興然而難易判焉是學也廢於河水俄頃耳何其易與於羅侯彌歷歲月而後已何其難且學之難易廢興固然矣至於諸生之為學也亦然烏乎視以為難而不之學矣夫不以爲難而不易而之學焉選自科目斯有光於其學無愧負於羅侯遷學之盛心矣邑侯名勳蜀永川人丁未進士○嘉靖辛丑請修學記畧曰羅田儒學洪武乙卯尹氏石公璞自今之歸厚巷遷於官渡河之濱以大水之變弘治辛亥尹氏羅公勳復遷舊址其材木皆仍舊費故三十年而俱剝落於蟲蠹矣俎豆露陳衣冠野處告之有司而漫不加措者十餘年也越嘉靖庚寅勞公樟來尹茲士三日講

廟一見而其心惻焉奮然以興作爲己任越月查庫藏得盜賊若干兩獨坐山香錢若干兩先已申送一半貯府公徑申當詳取向轉補修學及築城之費食允復命生員胡明睿蔡惟忠致書請二守趙公以敬估約



先師廟及兩廡共該銀八百兩轉委少尹章文憲教護廟工課章程焉於時少尹亦知尹氏廉介不可犯而虛心協濟共成厥美始工於庚寅之冬越辛卯夏廟廡一新併堂齋號舍俱舉且易櫺星門以石而其費又不出於趙公所估之數上下秉心之塞淵也何如哉越庚子尹氏祝公塲從生徒之請改遷以就山水之勝積取罪贖委之義民胡明新募工修理百度具飭凡慶功勞侯竟不消書一名於廟學梁拱間又不鳴之當道則後先照耀之功事不日夕而溷乎要當請大制作勒之金石以為有司興學之勸何如

圖書 四書一十五本

四書集註六本

春秋一十六本

易經一十本

禮記一十七本

五倫書四十八本

為善陰騭書二十本

勸善書二本

祭器 銅爵蓋二十個

鐵鼎一個

鐵豆共三百六十八個

小燭臺九十四個 齋戒牌一座

○以後尚欲續置未就未敢登載

社學

成化己亥知縣沈雷建于縣西其地湫隘嘉靖甲午知縣沈越買民地高爽者重建立社師以教子弟各鄉亦改淫祠為之

縣中社學一所在治西二百步係買民黃綬田建置講堂六間號舍共十二間大門三間嘉靖丙申知縣林宗柱扁其堂曰養

正鄉社學地未考以俟後之君子續補之

人物志

學校

卷四

人物何山川之產也一鄉之望也志之示勸也是故紀選舉以興材表忠節以作範嘉孝義以垂訓錄貞烈以立節列恩封以章教述流寓以樹風勸之道也

科貢 科貢之來遠矣而進士之科尤重鄉貢次之歲貢次之例貢又次之其流品之崇卑雖若相懸然皆有天下國家之責者大都在得人焉耳凡有善可書則就疏其下生存者只具其官以俟後之人續而修焉

歷科進士 ○按此類及外徙之進士可補作傳者甚多此缺見訂補

宋

王世規

本縣多雲人授少保卒封燕國公

○按此誤收見訂補

王韶

本縣多雲人嘉佑二年中章衡榜進士授政議大夫文淵閣學士禮部侍郎知制誥太子少保

○按此多誤亦誤收見訂補

元

李謙

字德潤本縣多雲人太定四年中李黼榜進士授行人卒於揚州葬旌忠寺前

○按此官誤見訂補

本朝

王澄

字克清本縣多雲人弘治辛酉中鄉試正德甲戌中唐阜榜進士初任番禺知縣行取為戶部主事陞員外轉郎中卒於官為人渾厚溫雅待弟有恩居鄉無犯嘉靖辛卯申請提學崔公桐入祠鄉賢

○按此太略

見訂補

葛 鷗 字子翀祖本縣多雲人由順天府鄉試正德辛巳中 楊維聰榜進士授兵科給事中陞雲南按察司副使 ○按此太略 見訂補

張明道 字希程本縣奉泰鄉人正德癸酉中湖廣鄉試第六嘉靖己丑中羅洪先榜進士初任北 京都察院都事左遷滁州判尋陞吳江知縣轉北刑部主事員外郎中陞浙江紹興知府

胡明庶 字功甫本縣平湖鄉人嘉靖乙酉中湖廣鄉試第三壬辰中林大欽榜進士觀通政司政卒于官平生篤志力 學尤精理數嘗取蔡氏皇極律呂二書朝誦夕思章釋句解或協為詩或衍為圖其所自序又揭中興幾二字

以盡蓋二書之蘊書成名曰蔡氏性理二書圖解 ○按此太略 見訂補 今行于世知縣沈越申請提舉郭公登庸入祠

歷科鄉貢 ○按外徙舉人 多佚見訂補

本朝

庚午科

廖仕芳 本縣平 湖鄉人

王 朴 本縣人授兵 科給事中

丁卯科

李楚山 本縣 人

周志雄 本縣奉泰鄉人 授戶部主事

壬午科

廖 敏 本縣 人

丁酉科

徐克賢 本縣奉泰人授禮 部儀制司郎中

唐友義 本縣多雲人 詳見節士

黃 呆 本縣 人

甲午科

陳 庸 本縣 人 ○按此官脫 見訂補

人物志

卷四

胡文彬 本縣 人

葉 剛 本縣 人

胡 凱 本縣 人

葉 璩 本縣 人

壬子科

徐 昱 本縣 人 ○按此官脫籍 漏見訂補

陳 哲 本縣多雲 人授通判

庚午科

廖 侃 本縣平湖 人授知縣

李 秉 本縣多雲人授 永平府教授

癸酉科

周 楫 本縣多雲人居家孝友歷官清慎教子 每戒驕奢貧士輒加周恤時人多之

方 端 本縣 人 ○按此官有脫 漏見訂補

蕭 洪 本縣平湖人為人恬淡耿介重義甘貧三任 學官忽一日有感與歎曰一官不難於解印

二子皆可以登科遂致政而歸餘資皆以分給諸弟 課兒讀書衣食不給啜麥飯躬採薪裕如也有友人

浴於河公親戒責其友愧感終 身不河浴如公庶不愧鄉賢云

乙酉科

徐 朴 本縣平湖人 授海鹽知縣 ○按此官有脫 漏見訂補

戊子科

聞 韶 本縣多雲人授石城知縣才識通融幹辦敏 給有防禦廣寇之勞有開拓城池之績見續

州府志 ○按此官有脫 漏見訂補

周 錦 本縣多 雲人

甲午科

周 銳 本縣多 雲人

壬子科

蕭時賓 本縣平湖人

○按此官有脫

丙子科

蕭時臣 本縣平湖人授上蔡

○按此有缺

王德純 本縣多雲人中鄉試第十授襄城知

○凡按

辛酉科

王澄 詳見進士

丁卯科

丁卯科

胡大有 本縣奉秦人

○按此有缺

戊子科

李漢 本縣奉秦人

○按此有缺

胡明通 本縣平湖人

○按此宜補其

傅全 本縣多雲人領廣西鄉

薦授南京翰林院孔目

○按此有缺

胡明書 本縣平湖人

○按同

庚午科

匡輔 本縣奉秦人中鄉試

第九陞烏撒府同知

○按此有缺

熊兆 本縣多雲人貫襄

陽籍中甲午科鄉試

○按此有缺

癸酉科

方敬 本縣奉秦人領順天鄉

薦授順慶府推官

人物志

卷四

四

葛盛 本縣多雲人領順

天鄉授蕪湖知縣

董儀 本縣人

魯倫 本縣人領雲南鄉

薦授寧波府通判

○按此有缺官會

樂真 本縣人

葛鵬 本縣多雲人領順天鄉

薦授寧波府通判

○按此有缺

鄒奇 本縣人

歲貢 按歲貢授官姓名

○按此有缺

王吉 本縣人

本朝

祝瓊 本縣多雲人授通政司

通政卒于河南通水縣

○按此另有考

胡進 本縣奉秦人

○按此官缺又此上

奇一人

蔡明甫 本縣奉秦人授提舉

○按此官缺又此上

周相 本縣人

○按此官缺又此上

祝成才 本縣人

○按此官缺又此上

樂鳳儀 本縣平湖人

徐志亮 本縣人

○按此官缺又此上

吳齡 本縣人

吳昇 本縣奉秦人授

福建道御史

盧鑑 本縣人

李志亨 本縣人

○按此官缺又此上

孫裕 本縣人授

四川縣丞

人物志

卷四

五

聞林 本縣人

熊飛 本縣人

晏謙 本縣奉秦人授縣丞

王惠 本縣人

吳文 本縣人

熊敏 本縣人

王杲 本縣人

蔚禧 本縣奉秦人

王定 本縣人

洪清 本縣人

朱啓 本縣奉秦人授河南獲嘉縣丞

曾煥 本縣人

○按此官地  
缺見訂補

○按此官佚  
見訂補

○按此另有  
考見訂補

饒觀 本縣奉秦人授四川重慶府  
檢校刻有文廟石香爐一座

周濟 本縣奉秦人授雲南布政司理問  
○按此有缺  
官見訂補

方正 本縣人

楊學 本縣人

盛思 本縣多雲人授  
真定府經歷

李澣 本縣人

涂敏 本縣人

喻鎬 本縣奉秦人

林玉 本縣奉秦人授四川成都府通判

周瓚 本縣奉秦人授四川江津主簿

鎮本 本縣奉秦人授四川仁壽主簿

胡全 本縣奉秦人授恩軍民府知事

李本 本縣奉秦人

韓忠 本縣人

張彥 本縣奉秦人

葉源 本縣奉秦人

樂九成 本縣奉秦人

葉隆 本縣奉秦人

陳倫 本縣奉秦人

項清 本縣奉秦人授向武州同

程仲智 本縣奉秦人授邳州判官

胡大倫 本縣奉秦人

曾思武 本縣奉秦人授建昌知縣

陳灝 本縣奉秦人

○按此另有  
考見訂補

○按此上缺蔣  
懷玉見訂補

○按此缺官後志  
亦訛見訂補

余大德 本縣奉秦人

聞廣 本縣奉秦人

鄒淵源 本縣奉秦人授太倉州判官

李本勝 本縣奉秦人授陽武縣丞

王應時 本縣奉秦人授高淳主簿

張顯榮 本縣奉秦人授江安知縣

祝壽 本縣多雲人授四川華陽主簿

余孟正 本縣奉秦人授揚州府衛經歷

張羨 本縣奉秦人居鄉醇謹如讓地息爭捐資助學不作佛事謹期功之喪其著者

祝鳳 本縣奉秦人

張羨 本縣奉秦人

王崑 本縣多雲人授崇府審理進階一級

○按此另有考見訂補  
又此上缺劉舉一人

○按此乃鄒淵源之字宜  
刪官地亦訛見訂補

○按此另有  
考見訂補

汪吉舟 本縣平湖人授河南臨漳縣丞

歐陽時 本縣平湖人

汪昆 本縣平湖人授淮慶府紀善

胡九鼎 本縣奉秦人

李朝陽 本縣多雲人 ○按此有缺官見訂補

李南陽 本縣多雲人授四川保寧府通判

張樟 本縣平湖人

聞嘉識 本縣多雲人授直隸合肥縣丞 ○按此有缺官見訂補

胡明睿 本縣平湖人應貢隨卒為人剛直好義在無間言嘗建書院於干道山之麓以教生徒來學者衆不受其資貧者助之及卒遺有所著兄弟文藝思錄二書

王德盛 本縣多雲人授四川瀘州判官 ○按此有缺官見訂補

舒翼 本縣奉秦人授四川鄞都主簿卒於京

黃梅 本縣平湖人 ○按此宜補入其官但後志均訛見訂補

聞奇 本縣多雲人 ○按此缺其官見訂補

董正 本縣平湖人授四川遂寧縣訓導

胡大亨 本縣平湖人授四川眉州訓導 ○按此有缺官見訂補

王德懋 本縣多雲人 ○按此宜補入其官見訂補

祝敬宗 本縣多雲人 ○按此宜補入其官見訂補

蕭克紹 本縣多雲人

例貢

張義 本縣平湖人授馬驛知縣 ○按此有缺官見訂補

胡祥 本縣平湖人任邛州判官 ○按此邛州志作蔣懷玉見訂補

胡明忠 本縣平湖人任唐府審理

人物志

卷四

胡寶 本縣平湖人授唐縣縣丞

胡明誠 本縣平湖人授壽州衛知事

汪衢 本縣平湖人授鉛山縣丞

張木 本縣平湖人授惠州府知事

汪慶舟 本縣平湖人授蒼梧知縣 ○按此有缺官見訂補

胡明儒 本縣平湖人

鄒圯 本縣奉秦人授廣信府永豐主簿 ○按此地誤見訂補

蕭珍 本縣平湖人授荊府奉祠

汪乘舟 本縣平湖人授永新縣丞

胡明詩 本縣平湖人授清豐縣丞

朱祿 本縣奉秦人

周書 本縣多雲人

胡明著 本縣平湖人 ○按此宜補其官見訂補

胡汀 本縣平湖人

汪鳴鳳 本縣平湖人 ○按此宜補其官見訂補

胡明顯 本縣平湖人 ○按此宜補其官見訂補

汪梧鳳 本縣平湖人

汪起鳳 本縣平湖人

汪季鳳 本縣平湖人

王棠 本縣多雲人

汪一鳳 本縣平湖人 ○按此宜補其官見訂補

汪文鳳 本縣平湖人 ○以上由生員應例 ○按此宜補其官見訂補

張翼 本縣奉秦人由優秀應例

本朝

薦辟 辟薦之典其廢久矣志之存古也  
國初如宋劉基非辟召之尤者乎如楊時習况鍾之徒不可數皆以吏役至卿佐當時咸稱得人焉誠  
於制科之外別立辟薦之典行之天下不唯其數  
唯其人其於化理之助多矣此薦辟之所以志乎

方雄才 本縣奉秦人以人材擢鴻臚寺卿

太宗御書如存堂孝思堂  
二扁以旌其門

王思忠 本縣多雲人以人材  
擢江西分宜縣知縣  
○按此可列  
傳見訂補

李子文 本縣多雲人以人材  
材擢治化縣知縣  
○按治化二  
字訛俟考

程志剛 本縣奉秦人以  
孝廉舉授行人  
○按此後諸志誤志剛為舉人不知孝廉乃明  
初薦舉科目可訂後訛此尚有缺官見訂補

聞玉成 本縣多雲人以人材  
擢江西奉新縣知縣  
○按南昌府志作金玉成  
奉新縣承此誤見訂補

程 榮 本縣奉秦人志剛之子由吏員擢禮部主事轉員外郎中陞廣東瓊州府知府少喪父事母盡孝及為主  
客郎中嘗繪思親圖以寄其思祖有義田為族之貧者典賣公贖回定作祭田今猶存其在瓊州有惠政  
民立生祠今與蕭洪周楫  
○按此應補入者  
甚多見訂補

程 薰 本縣奉秦人以人材  
選江西寧府儀賓  
○按此應補入者  
甚多見訂補

人物志

卷四

李 鍾 本縣奉秦人由天文任掣儘有奏績陞北欽天監副  
尋陞南京監正滿復陞南京太常寺少卿因家焉  
○按此與下李相另有考明代重天文升常  
少光少者仍均掌監事此漏叙見訂補

李 相 本縣奉秦人由天文  
授南京欽天監司晨

論曰薦辟乃國初之典而反居科貢之後者傷古道之不復也其存之而不遺者何志古道之  
復興也數子之中必有可稱焉以時久無稽故不獲詳若以不列科貢之途而畧之則非矣

忠臣 劉廣武夫也能抗孤忠以殉國之難顯其親而成其名彼  
○按明忠義及武  
職多佚見訂補  
儉生以遺臭者亦愧甚矣噫若廣者謂之奇男子非耶

本朝劉廣 本縣多雲人洪武初以軍功授指揮會守永平有膽畧善用雙刀嘗病且殆語曰吾當臨陣死王事安能居  
隔下死兒女手後胡騎寇廣率四十餘騎與胡遇於城北力戰死之葬於南京紫荊山側仍摘原籍功臣田二  
百畝與戶丁耕食守其  
父應春 御葬之墓  
○按此上應補入者甚多  
其子官亦宜補見訂補

節士 甚矣功名之溺人也宋南渡之末夷虜深入適丁試期士子猶嘯嗷塲屋不忍棄去况當承平之運乎  
友義自願事變之臨義不肯仕遂飄然歸隱以終其身此其志節豈特匹夫之諒哉故獨表而別之

本朝唐友義 本縣多雲人中乙酉科鄉試後入太學遇事感慨遂浩然而歸朝耕暮讀自娛不復有仕進之念年九十  
餘成化元年本縣奉

詔榮以冠帶辭曰老將斃矣補報無日安敢受此終不就號多雲  
耕叟至今人高其行嘉靖辛卯申請提學崔公桐入祠鄉賢

孝子 子以孝得稱非古也然不章之則無以示勸古道益微矣羅自元以來僅得二人然且一旌一否豈其  
孝有優劣歟抑所遇之幸不幸也嗚呼為孝者求無愧吾心焉已矣知不知旌不旌則有司之責也

元吳大中 夫婦善事二親皇慶壬子有司以孝聞旌表其門翰林待制奉議大夫兼國史院編修彭寅亮撰文吳大中  
字時夫號愛山其先信之弋陽人也宋建炎間父季益嘗宰太湖羅田六安州判安慶府事遂宅於贛陽義

城之獨坐山時夫天性孝敬篤志經書菽水盡歡彩衣致養父七十二寢疾朝夕衣不解帶極力醫療罔瘳不食  
泣血幾絕於獨坐山之麓奉母陳氏廬于墓側十有七年夫婦定省溫清不離左右稍失調護則為減食母年

諭九襄無疾而逝居喪哀痛逾昔終身永慕操履仁慈遐邇莫不感動有司具以孝聞上旌其門曰吳氏孝子其里人遠來京師述彼累世之孝請記於余余謂父母之恩昊天罔極生事愛敬死事哀戚固不足以報其恩之萬一至於移忠下國彰名於世亦人子之常事耳而今為異志夫且吳氏累葉忠孝至時夫又卓然可尚挺出流俗真可為叔世之勸朝廷之寵渥宜也若夫太朴未散道亦強名復何孝之可言哉皇慶壬子元年孟春記○與李

謙劉廣俱入祠鄉賢 ○按此年代誤見訂補

**胡全** 本縣平湖鄉人儒學生自幼知孝親凡得果實可口者即歸以食母既長一順親志兄弟七人親老不能持刀向左手內股口訖而割肉作糜奉母良久母忽曰是何藥味香甜索粥食之數日而愈月餘其妻失口言之人始知其為孝感所致是歲慈烏巢於庭邑侯段容欲奏

聞而全懇辭且諱曰無割肉事乃止迨逾三載母疾仍作竟不能起全終身思慕士夫見者留題

**義士** 正福一匹夫也而動郡守之祭得義士之名紀事者不敢遺焉義之足以感人也如是為義者可以勸矣

**張正福** 本縣奉鄉人素勇敢有武藝正德六年流賊趙風子顧子鎮徐彥明等由竟歷豫寇掠州郡七年上下走福等追至屯所殺賊首顧子鎮等八人冒險深入為賊所殺弟姪正顯友舜友珠亦同其難郡守胡公定作文遣官祭之曰庚午之冬辛未之春巨寇競起有十餘羣由竟歷豫來我楚濱擊舟直下振迅如霆強弓勁矢披靡莫禁大藩巨鎮堅閉城郭掠士女公私俱焚羣侯側席謀及于徵召勇士建此壯圖選以是衆惟爾為從討賊之事期滿成功十有九日羣賊跨岸馳馬深入暴我羅田焚燬官室爾自黃州徒步後襲隔溪抗言親冒矢石羣賊被魄挽馬東出爾忘遠勞追逐莫息日維乙亥天將昧爽直抵賊巢應變如響初戰方交賊長奮爾再前連誅三黨携率子弟兩翼並攻投戈所向復殺囚桎爾知有義競前不悚被賊所扼挺挺山聳迅發一足賊隨已沒羣賊嚙齒以爾首戮噫人孰無死捨身殺賊爾不負人之所許人孰無舉連誅八賊爾不負我之所取崎嶇冒險爾為我之長城然崇德報功我亦為爾立廟祀而紀頌名九泉有知來格來歆本縣將廢申明亭基三間與福族共立祠祀之在

人物志 卷四

按察分司 前今廢 ○按此間有誤見訂補

**貞烈** 古云丈夫失道道在婦人女之貞烈其尤可嘉尚也已然或困于窶或厄於讐或屈於微隱之而不以聞聞之而不見報者多矣貞烈之見知於世不其尤難也哉是故稽實以示後則存乎志表樹以維風尚向

俟所

**本朝徐氏** 本縣人程祥之妻年十九歸祥生一子仲仁年二十四祥卒誓不再夫奉太姑盡孝年七十餘卒 ○按祥應作詳瑩之孫見訂補

**胡氏** 本縣人毛遐溪之妻年十六適遐溪生一子必登年二十二遐卒三年服闋姑令再適誓死不變節奉姑盡孝年八十餘卒 ○按此後諸志都誤作王遐溪得此可以訂正見訂補

**李氏** 本縣人十八歸本縣舉人周錦年二十二而錦卒止生二女誓不再夫奉公姑盡孝年踰七十而嚼冰嚼藥始終如一曰有司疏其事以聞

**徐氏** 本縣人年二十歸本縣人張義無嗣年二十三義卒繼姑欲強以適人徐氏曰夫是故家人我今再嫁寧不貽辱死守不從立嫡王氏一子年五十五卒

**王氏** 本縣人即徐氏孀年十七歸生員張美生二子年二十二美卒與徐氏同盟不再嫁

**周氏** 本縣人年十五歸本縣江尚忠三年夫卒隨一子半歲周氏與姑同守鄉人多求娶者姑有許意周氏以死自誓事姑曲盡孝道後姑患風疾不能動左右扶持晨昏不替

**許氏** 本縣人年十八歸王必文生一子年一歲必文卒三年服闋公姑宗族強再適許氏死誓不從事公姑盡孝

**聞氏** 本縣人歸余忠素賢知事舅姑一日姑病甚篤聞氏調護不能愈遂為夜出戶割股作糜食之姑病即愈逾十年姑卒越二十年聞氏亦卒今人頌之

**王氏** 本縣人家世殷實父蚤喪氏居長諸弟俱幼以父喪弟幼恐弟失遺業宗祀誓不出嫁撫弟成守家不失內操有則年九十餘卒

恩封 封贈者國家推恩之典也其志之何顯君之仁且以章父之教也父慈而教得恩榮焉為父者可以風矣以其有風道也故亦於人物焉列之

宋

王世規

政議大夫文淵閣大學士禮部侍郎知制誥太子少保詔之父封燕國公

○按世規德安人此誤收所書官一切都訛見訂補

本朝

劉應春

守永平指揮僉事廣之父洪武十年贈宣武將軍指揮僉事母江氏贈德人

張立

馬驛知縣義之父正德四年贈徵仕郎山東濟南府武定州判官母韓氏贈孺人

○按驛乃邑訛

王永昌

戶部郎中澄之父嘉靖四年贈承德郎戶部主事母李氏贈太安人

王澄

南京雲南道御史德純之父嘉靖十九年進階奉政大夫母許氏進封太宜人

張大洪

浙江紹興府知府明道之父嘉靖十年贈文林郎都察院都事母毛氏封孺人十八年加贈奉直大夫刑部廣東司員外郎母毛氏加贈宜人

汪汶

廣西布政司都事慶舟之父嘉靖十三年贈徵仕郎廣西布政司都事母胡氏封孺人

寓流

古人有家世范陽因葬親而寓伊水者有家世河南因避聘而寓洛者亦有家世金華因仕而寓分寧者則夫以天下為家而不溺於懷土匪直今日然矣羅田舊有流寓藩郡二志皆已登載故志之以表古今

人物志

卷四

九

元

人物不屬之况

○按此唐宋元之流寓可考者在十人以上此都佚見訂補

吳大中

其先信之弋陽人元時徙居羅田行實詳見忠孝傳

蔣翹之

江西廬陵人由舉人任本縣儒學教諭因家焉善吟咏凡山水之勝多經品題

○按蔣為明永樂舉人本明人此處朝代誤作元人辨見訂補

羅田縣志卷之四終



羅田縣志卷之五

惠政志

從政有經利民為本故惠顯懷保哲王之政必先焉羅田有備荒之倉有恤孤之院有療病之局有歛埋之塚 國家之仁政備矣良有司加之意而不視為虛文焉羅之民其有瘳乎

預備倉四所

一在縣東六十里一在縣北四十里一在縣南一里一在縣西四十里俱成化中知縣徐泰買地建立儲穀以便各方賑濟嘉靖丙申知縣林宗桂因地去治遠而侵于民且一時不能重脩申蒙將各地賣價入官棧脩四倉於縣儀門內東扁曰民天隨圮於大水嘉靖辛丑知縣祝翊重脩俾民食共二十四間

養濟院

在縣北北塢龍成化初知縣徐泰建弘治己未縣丞魯瓊重脩嘉靖癸未知縣夏國孝因關東新街買民黃綬城西隙地遷建隨廢丙申知縣林宗桂遷建於西新街社學之後延四丈袤七丈

惠民藥局

在縣布政分司右

義塚

在縣西二里成化中知縣徐泰買民山地一區以歛埋民之無歸者

官渡一

縣前官渡河遇春夏山水泛溢限隔南北往來唯難官置船一隻舟子掌之以通行人每遇破壞則呈有司脩補之

祀典志

惠政志

卷五

國之大事曰祀祀之禮凡以為民也凡有功於民者祀之報本之義也是故風雲雷雨報之於天也山川社稷城隍報之於地也先聖先師鄉賢名宦之屬報之於人也祀期儀節備焉昭敬道也有司者謹非族焉則祀典正矣志祀典

廟祠

廟祀之來遠矣革封號之名而正以某子之稱立啟聖之祠而信以四配之父增諸賢之所未備而黜諸子之所未安則自

今上始故志之加詳乃若名宦鄉賢之有祠詳舊制也法皆宜書

按元代例有之廟祀都缺見訂補

先師廟

每歲春一月秋八月上丁日釋奠

先師孔子

舊稱至聖文宣王嘉靖庚寅改正撤像易以木主

四配

舊稱國稱公今曰某聖某子

十哲

次于四配亦稱曰先賢某子

東廡澹臺澉明以下五十人西廡必不齊以下五十三人

七十二子今稱先賢某子春秋以王來諸儒今稱先儒某子增祀后蒼三

通歐陽脩胡瑗四人黜申黨公伯寮秦冉顏何荀况戴聖劉向賈逵馬融何休王肅王弼杜預吳澄十人以林放蘧瑗鄭衆盧植鄭玄服虔范滂七人各祀于其鄉其祭品祭器祭禮暨月朔望晨參如制

啟聖公祠

祀啟聖孔公以先賢顏無繇曾點孔鯉孟孫氏配先儒程昞朱松蔡元

定從祀於春秋上丁日先舉焉

名宦祠 祀名宦志所載若干人

鄉賢祠 祀人物志所載若干人

壇壝 古人建國必立壇壝曰社稷曰風雲雷雨山川曰邑厲鄉厲所報之義悼憫之仁  
寓焉祀典其可廢乎故志壇壝而城隍之神皆能為民禦災捍患者因類書焉 ○按宋元例有之壇  
壝此都缺見訂補

社稷壇 成化己亥知縣沈雷買民地新建于縣東北一里嘉靖壬辰府經歷陳伯義易以縣西邑厲壇  
連年地弗効靈水旱蟲荒薦至歲庚子知縣祝翊定復舊位歲春秋仲月上戊日祭之如制

山川壇 在縣東南二里成化二年知縣徐公泰重脩弘治三年知縣羅公勳  
再脩嘉靖庚子知縣祝翊重修歲春秋仲月上巳日祭之如制

邑厲壇 在縣西一里嘉靖壬辰府經歷陳伯義易以社稷壇歲庚子知縣祝翊因地弗效  
靈乃定復原位仍修築牆宇歲春三月清明秋七月望冬十月朔祭之如制

鄉厲壇 平湖鄉厲壇去縣三里奉泰鄉厲壇去縣三十里多雲鄉厲壇去縣  
五里而三鄉二十五里每里又有厲壇焉不能悉載期同邑厲

城隍廟 在縣百步外成化初知縣徐泰重修嘉靖甲午知  
縣沈越樹牌坊一座歲丁酉知縣林宗桂置有

勅置廟門東小房二間門西小房二間歲丁酉知縣宗林桂騰送儒學收  
賃錢二兩以給學中心紅及紙劄之費其餘延一十五丈六尺袤六丈

羅田縣志卷之六

藝文志

○按自宋玉笛賦以下及唐宋人咏物產詩及張耒游羅田諸作宋明人刊書序跋宋人書劄明人為縣人之碑記可數十篇此均佚見訂補

文者政理之精華而皆古人之神思也其藝之何也文焉藝也然吾觀勝作諸家瀟瀟乎有風雅之遺焉秩秩乎有風教之寓焉則又非藝焉已也乃若辨體裁較工拙嚴去取則以俟于具眼者固非予之所敢知也

詩

宋紹興何錫汝玉虹泉石刻一首 無名氏次韻一首

本朝參議王鼎詠石險四首題塔山寺一首玉泉寺一首

提學沈鍾詠石險四首

蔡潮詠石險三首

潮詠石險詩尚多不能悉載

郡守盧濬題多雲山一首馮應菴巖齋一首過周家寨一首村婦吟四首題塔山

寺二首觀音寺一首

藝文志

卷六

同知王相詠石險一首

吳景題府館壁間一首

夏廷芝一首

通判毛應時一首

推官羅翰一首

以上三首題同前

知縣沈雷題玉泉寺一首

夏國孝訪張玉泉一首

沈越喜雨一首

教諭陳瓚詠石險一首

訓導石彬詠景致八首

○按此不止八首見訂補

趙廷佐詠古松一首

鄧穆訪張玉泉一首

隱翁無名氏題七楊衝居一首

蔡芳詠石險一首

賦

同知謝朝宣石險賦

記

尚書倪謙去思碑記為知縣徐泰作

編修彭寅亮旌孝記為孝子吳大中作

御史龔湜去思碑記為知縣勞樟作

提學沈鍾遷學記

通判毛應時翠屏記為舉人張明道作

誌銘

翰林院典簿朱善銘劉將軍應春墓

藝文志

卷六

祭文

郡守胡定祭義士張正福文

修武志

修武何所以威不軌而戒不虞也是故有民兵之設有軍政之修有關寨之防有鄉堡之警保民者時清練而巡飭之則備以無患矣志修武

民兵

城非兵莫之守兵非民無所出今之縣治留守者藉兵於民以專守禦之寄亦古人兵起于農之遺意也羅田例因丁糧多寡以分兵之名數大抵僉戶之近上考為頭目而下戶皆幫貼也簡練則以秋冬警急

則聽差役

民壯一百二十五名

舊額二百五十名後改二百名嘉靖壬寅知縣祝翊改一百二十五名其金鼓旗物弓箭鎗刀各隨其所長者而役之每年工食四兩八錢

大閱場

在縣西南一里正廳三間演武廳三間將臺一座

軍政

國家之制以罪謫為兵蓋漢武七科之謫之遺意也羅田雖無衛所亦有軍役但其所以為軍者洪武初見煙起戶梁之而一時老故之家少流集之徒多故厥後之聚散無常而軍籍之名存實喪矣將來清勾

之擾不知將何所底止也因憑梁軍冊以訂於後

洪武二十二年採軍四千

有冊可考今不悉載

清軍之弊

羅前此清軍之官多付之吏書里老其奸滑者死生換解係於財帛縱有震世之威不能塞其無情之口而吏書之弊則有不可勝言者如軍戶孫丙原在趙甲之下而李丁則在錢乙之下此定籍也一有清審新造軍冊則移孫丙於錢乙之下捏作見解或換無或跟捉而鄉實無人錢乙不過廣用貨賄又得免矣若復有清審則仍如前弊改造舊冊以為印證里老吏書所得不知其幾何况其中有改名姓字畫以作無人者有戶無壯丁而以幼丁補錄者有原逃不在而作換解者有在營有丁而解查者有丁盡戶絕不與分給者有換無名籍者有解調別衛而誤勾者有同名同姓而冒勾者有充軍在前而分析在後者有以義男女婿而冒替充軍者有以三戶梁籍而副不認正者有正缺而副不承認者非一端近年固得清查痛革之法而官之去留不一為今之計不若遵照梁籍乘其大造訂於書冊散給各戶斯可革其弊之萬一矣匠籍之弊亦如之附於衛役志

關寨

關寨者衆塗棲聚之區山水阻塞之處也地險雖存弛備則廢矧隣淮豫之僻去治遠遼今昔盜賊皆由此出沒其又可忽諸故悉紀各關里至之修短衝塞之緩急以著未然之防

鳳凰關

在縣東三十里自此東北去石門關一百里

石門關

在縣東北一百里抵英山界由此北去甕門關五十里

甕門關

在縣東北一百八十里即古岐嶺關抵六安州界由此北去青苔關一十里

青苔關

在縣北一百四十里抵六安州界由此北去栗子關二十里

栗子關

在縣北一百八十里抵六安州界由此西北去銅鑼關一十里

銅鑼關

在縣西北一百四十里抵商城界由此西北去松子關三十里

松子關

在縣西北一百八十里抵商城界由此西北去平湖關三十里

脩武志

卷六

平湖關

在縣西北四十里抵麻城界

右八關惟甕門青苔栗子松子銅鑼最為緊要

光山寨

在縣東六十里即石馬山寨

周家寨

在縣北六十里郡守盧澹過寨有詩云野水流清細春山曉氣濃一犁人頌雨到處馬嘶風日色開林口桃花映馬衝兒童還愛我旬旬望高峯

石壠寨

在縣東南四十里

鼓羊寨

在縣西北四十里

熊崖寨

在縣東北十里

猴豬寨

在縣東四十里

觀音寨

在縣東南六十里

望英寨

在縣東北三十里

斑竹寨

在縣東六十里

鄉堡

成周設士師之職立禦盜之制相翔誅於聚穰之中夜士詔天分夜之禁所以防盜賊使行人也羅田鄉堡之設猶有周之遺意焉在昔元魏之李崇後周之竇嚴皆行之而有效矣是不可以不志

嘉靖二十年奉文約地方遠近以十里爲一團統十堡一堡統十家互相覺舉應援

以防盜賊

每團設粉牌一面楷書一團人戶姓名編成行伍設金鼓置旗號築烟墩建營房有急則一里傳十里及百里千里也

團圍營房

三鄉共三十二所每團廳堂三間大旗一面地名不及細開

巡警冷舖

城中八舖

後城四舖

從北門至縣後二舖從西門至縣後二舖

脩武志

卷六

四

羅田縣志卷之六終

羅田縣志卷之七

災異志

災異也志之何敬天戒也嗟乎天人之理微矣然庶徵衍於箕疇而感應之神昭乎不可誣者變之來也其可獨委於天乎是故聽一邑之政則召祥弭災者令之職也志災異

災異

○按自春秋以下兵事災異可書者有二十餘事此皆脫見訂補

元至正辛卯徐壽輝與麻城人鄒普勝等以妖術聚眾反以紅巾為號

壽輝別號真一本縣人首陷蕪水縣

及黃州以蕪水為都國號天完僭稱皇帝改元治平以鄒普勝為太師掠江漢而窺全淮勢甚猖獗庚子五月為偽將陳友諒所殺

○按此太畧其本末見訂補

本朝成化己亥信陽軍聚眾為盜

弘治乙卯固始人董官僭號天王聚眾入寇

○此另有考見訂補

正德己巳大饑

正德辛未流賊顧子鎮趙風子徐彥明等深入羅田

流賊皆西北人劉六劉七之黨也由竟豫歷荆楚深入羅田劫掠民逃深山縣治如洗張正福

統弟姪追之殺顧子鎮等八人餘賊敗走

○按徐乃齊訛見訂補

災異志

卷七

正德壬申流賊李勝二等六百餘人深入羅田

先是報書至官民逃竄未幾賊盤據城內民居月餘郤總兵統兵追及乘夜賊方醉臥盡殺之積尸數屋流血

成

○按此書事二則誤合賊二股為一股又訛賊姓又誤將兩次事倒置辨見訂補

嘉靖戊戌大水

夏五月大雨彌月自新街波浪洶湧如山摧泛居民百餘家

嘉靖己亥冬十月盜張友讓友勇餘黨方大吉葉禿子等殺多雲鎮巡檢許昂

巡撫具疏

以開即行本府委通判同祝縣尹集兵會勦掃剔巢穴民獲安寧

○按此書事不甚詳見訂補

嘉靖庚子大饑

○按此上四則天一閣本在脫去一葉中茲據蔡氏康熙前志災異沿用元文者按之恰合特行校補

祥瑞

○按此尚有宋政和產芝之類見訂補

乳生三子

奉泰鄉王氏歸本鄉李豪弘治己未五月初九日寅時生三子

瑞榴

正德庚午學諭銜赤榴數枝每枝九花俱結實一上八下尊卑有序是年庠生匡輔果中第九繼而多連登魁榜官於此者亦屢有陞擢蓋瑞氣之先見者也

瑞花

明倫堂庭植紫荊二株每當科期老幹花盛則登科在長嫩枝花盛則又在少屢試屢驗亦瑞氣之見於物類者今不存

論曰羅自國初以來水旱之數意不止此豐年之慶亦必多焉非如今所書之瑞之微也舊志不修故多失其傳惜哉後之繼今者幸即以時事而登之其毋使後人有無徵之嘆乎

羅田縣志卷之七終

羅田縣志卷之八

雜志

雜志者志之餘也事非關於政教者不必特書故雜志以別之也雜而志之何也今昔之廢興無窮古蹟所當稽也弔古之思難忘坵墓所當考也佛老之居未廬寺觀所當知也淫祀之惑未解祠廟所當識也亭閣之建立有數雖微必錄僊釋之在誕間見雖異必書存故也

古蹟

古人見沙壘而憶孔明遊赤壁而懷子瞻俯仰今昔有感慨之意焉故羅之古蹟雖亡其實而皆存其名亦以啟人之瞻慕而傷悲乎

○按古蹟自漢以下有二十餘處此皆脫見訂補

舊縣治

今縣東六十里魁山之陽

申明亭

在縣治按察分司之前今廢

陰陽學

在縣西一百二十步

醫學

在縣西一百二十步

巡檢司

在縣東南五十里石橋以上今俱廢

○按此恐是宋茶場官廨之誤見訂補

雜

志

卷八

儒學

在縣東歸厚巷後遷縣南官渡河之濱今復遷舊址

高明堂

在舊學明倫堂後景泰三年訓導葉春建以為講道之所右都御史李實扁額知縣徐泰有詩今廢

修西小亭

在學西教諭陳瓚有記今廢

志學軒

在學西齋之左訓導趙廷佐有記今廢

社學

在縣治西二百步城西門內知縣沈雷建前後書堂六間今廢

塔山書院

正德癸酉通判毛應時借塔山寺隙地建書院三間嘉靖乙酉知縣夏國孝拆修學衙今廢

○按此合後志考之可訂正後來之訛見訂補

預備倉

共四所東南西北各一今廢

養濟院

在縣北龍壩今廢

大閱場

在便民倉之左嘉靖甲午知縣沈越改遷於倉基

仙女臺

在縣西一里民傳仙女寄迹於此遺跡猶存

通濟橋

在縣東

霸城橋

在縣南

玉虹橋

在縣東今俱廢

文昌祠

在儒學明倫堂左今廢

晏公廟

縣東一里許在東嶽祠左今廢遺址尚在當屬之官

聖恩堂

在縣北一百一十里今廢

○按聖恩二字誤書見訂補



迎饒亭

在縣治南三里成化九年知縣張暹買民胡昂地建正廳三間廚房一間今廢

徐壽輝故址

在縣東一百二十里人稱是奸雄蟠據之地

○按此故址二字太渾另有考見訂補

坵墓

古人感覽四方思其人而不得見則拜於其墓况桑梓之邦先賢之遺體在焉可無志乎然羅唯劉將軍之墓為最顯王詔特以位高而存之耳其餘世遠無考只仍舊志以書

○按宋元

有應載者此均脫見訂補

宋王少保韶墓

在多雲鄉三十里地名雙河口

○按此誤載據九江府志德安縣志韶墓自在德安縣西望天山下甚詳確另有考見訂補

陳御史墓

在王少保墳山之西

宋學士墓

在多雲鄉七十里地名東安

元吳知縣季益墓

在縣北平湖鄉七十里獨坐山麓大父也皇慶壬子冬月望日奉議大夫淮西宣德肅政廉訪使溫廷進忠翊校尉新州路羅田縣達魯花赤兼勸農事長安徵仕郎新州路羅田縣尹兼勸農

縣教諭慶王佐新州路羅田縣典史郎世榮同立石

○按此書朝代誤碑刻題名亦有訛脫見訂補

鄭郎中墓

在舊縣魁山下去縣治六十里

夏行省墓

在縣東北十里地名熊崖寨

○按此脫夏氏名書官亦不合見訂補

本朝

雜

志

卷八

勅封宣武將軍應春墓

在縣東北五十里亭子山翰林院典簿臣朱善奉勅撰洪武十八年八月癸亥

皇帝御奉天門時有永平衛指揮僉事劉廣陸辭葬其父應春

皇上乃曰朕以武功定天下凡將士建立奇功者於其祖父父母必有褒贈之典以爵冥冥者也今廣既奉喪歸葬宜加碑以銘之庶不負忠者之勞特命臣善述辭以銘之臣善拜手稽首謹撰按劉氏譜系出自陶唐所從來遠矣世居贛州羅田縣者廣之族也廣祖慶父應春皆服田力穡克勤克儉鄉里稱善人應春後以兵亂徙居六安因家焉廣自兵興即以軍士屬官寧侯曹良臣麾下不避難以勤謹見信任歲甲辰奉

旨職千戶守廬州歲丁未從攻湖州克之移守大倉復調征蘇州率所部摧堅破銳數獻俘馘張氏之敗廣與有力焉隨大將軍下中原於是拔益都定濟南平東昌克棣州河北之民扶携而至回軍汴梁從宋國公馮勝取潼關再息兵於汴

七月從大將軍渡河取衛輝降彰德八月至燕都胡君北遂破永平大將軍席卷長驅勢若風雷不數月間山東西關內外悉皆定矣凱旋命守通州與元相也速戰勝之復從左副將軍趙元守上都復守山西

從副將軍援大同與元將脫里伯等戰有功轉戰定西勝之已而凱旋命守通焉洪武四年

聖天子以廣積功累勞宜加陞擢適命以宣武將軍永平衛指揮僉事在職七年綏綏邊境軍民安靖上甚嘉之十年春三月父應春以疾終於六安計至廣衰絰哭泣哀動僚屬本衛為請於朝未達

上聞而乃元將盧兒以兵潛入永平界內將斥候者擒去邊報既至上乃聞知星夜令人馳驛永平命廣率兵前去追捕廣聞

上命至釋喪服披甲自帥精兵步騎千人兼程並進抵所在俘彼州主而歸既還已三日矣胡將遣精騎千數追急相近廣待彼來於是伏銃士於崎嶇草莽之間廣數騎常行其追者見人衆頗寡直趨而戰廣方且勒兵與戰未久胡兵不能當廣

之勇衆有少怯其伏兵四起於是俘胡將平章欽察右丞阿末改帖木歹兒參政蠻子等一十六人再戰復生擒平章安童並首目人等其餘獲到戰騎軍命大勝而歸捷音

上聞乃詔入朝遂以八月日至

京師陛辭之日賜格幣二百緡俾歸葬焉應春享年七十有四以子廣功封宣武將軍指揮僉事妻江氏享年四十有五以子廣功追封德人應春父慶享年八十有三母湯氏享年八十有五應春獨生廣乘風雲之會依日月之光遂至克顯其先世之陰功豈偶然也哉廣祖父母及母俱葬羅田今又將奉父柩自六安歸葬先墓之側亦可謂能子也已謹奉

勅爲之銘曰  
家之豐惟子之功永世無窮身之貴惟子之力永世無敵錫予之厚封爵之崇視茲銘刻於以勸忠

寺觀 寺觀之居韓子嘗欲廬之志奚取焉蓋名山勝景多其所據而古今之題咏附之存之或足爲輿地之證耳

塔山寺 在縣東一里唐貞觀間從塔山遷於此洪武中重建成化知縣徐公泰扁其門曰萬壽福地○王少參鼎詩云此水此山俱眼前我來觀化信前緣松聲萬壑供醉耳花影一樓張別筵蕭子王生堪發興溪光禽語自長年虎溪相送還相憶今夜空山抱月眠○郡守盧公濬二絕萬山舊染堆螺髻一井新開浸碧天人面桃花古如  
此莫教啼鳥笑流年○已渡碧溪過小寺忽看玄雀漾長天爐煙未斷花迎雨莫笑黃楊厄閏年  
○按此年代誤王盧諸詩均誤收

見訂補

觀音寺 在縣多雲鄉三十里郡守盧天台濬詩一絕云看盡羅田山外山倦依流水宿松關分明夢裏神仙語前路風光十八灣

十王寺 在縣東奉泰鄉六十里

集仙寺 在縣東奉泰鄉七十里嘉定五年建嘉靖甲午知縣沈越過其地樂佳山水嘆曰真古刹也乃移香山廢寺鐘鼓於內以鎮山靈扁其門曰祇園

麻姑寺 在縣北多雲鄉九十里

真覺寺 在縣北多雲鄉九十里

僧塔寺 在縣北多雲鄉一百二十里

廣化寺 在縣北多雲鄉一百四十里靈門關之下久廢嘉靖癸巳知縣沈越據舊僧悟玄告復與舊址嘉靖己亥沿關內外盜作僧周等奮身擒殺有功知縣祝明申明修復給賞入官盜田二百石收寺當差因以禦羅疆之寇

雜志 卷八

○按此有宋人詩及考證見訂補

韓塔寺 在縣北平湖鄉一百里有塔二座

玉泉寺 在縣西平湖鄉二十里王少參鼎詩云路岐千載盡西東入寺還驚色界空一派玉泉通地脈千尋石壁見神功疎簾晰晰弄山月短褐蕭蕭吹野風勝地登臨意無極白雲回首更重重○知縣沈雷詩一首遠入招提境東風

宿雨晴落紅幽徑滿新綠小池平絕勝投名社何須向化城老僧延坐久忘卻世間情

仁聖寺 在縣東南奉泰鄉六十里

玄妙觀 唐貞觀初建於魁山後移縣北洪武初遷縣南一百步永樂中重建有碑思州府知府汪本撰文今不載  
○按汪大本洪武初官武昌知府此有脫誤見訂補

天祺觀 在縣南平湖鄉三十里  
○按此名訛見訂補

光山觀 在縣東奉泰鄉六十里

香爐山觀 在縣北一百三十里

真武觀 在縣西南一百四十里成化初知縣徐泰置買斷水縣民地建正賦倉在石潭岸湖水之隈求以避水患遠火災也乃築觀於倉前以鎮壓之果獲其應後羽流於此祈雨者真武亦顯其異徐泰立石頌之

祠宇 禮云祭非其鬼謂之淫祀淫祀無福羅之祠廟不登於祀典者亦備書之以見邪惡之未正而反經之君子當有以破其惑也

百神祠 在縣儀門外成化六年知縣徐公泰重建

東嶽行祠 在縣東一里正統中縣丞沈俊建成化中知縣張暹重修正德中居民再修

關王廟 在教場東城中居民建

五顯廟 在縣東南一里嘉靖乙酉知縣夏國孝欲毀之夜夢五人借傘又任民重修

相公廟 在縣東里至正建

排衙山廟 在縣南十里至正間建其山如排衙故名有神能驅疫補逃祈禱雨暘多效邑人奉之

亭閣 亭閣之建所以時遊觀節勞佚也其志之者於以存舊而寄思也塔樓軒附焉亦存舊寄思之意也

去思碑亭二 在護樓外東西兩傍知縣林宗桂建

玉皇閣 在縣治東玄妙觀正殿之後嘉靖辛丑歲衆建

涼亭六座 一在縣北石柱山一在縣北觀音寺一在縣東北破缸街一在縣東平頭嶺一在縣東鳳凰關一在縣西栗子坳

韓塔大小二座 在縣北韓塔寺

翠屏樓 在縣東塔山寺有翠屏記本府通判毛應時撰其略曰羅田玉泉張希程少負奇質以明經舉於鄉甲戌落第于春官謂尚友天下士為未愜乃潛居塔山寺之西樓篤專古訓局戶數年未嘗有半武於公庭後進之士多及其門虛往而實歸予適以公務會霍山令王君汝學於樓之西王君語予曰希程經濟才非可以科目中人視之因登樓檢其疇昔所筆者皆足以發前賢之蘊時對酌予樓而有高阜屏障於前草木森鬱青翠重重予顧而喜曰壯哉斯樓之奇觀也

雜志 卷八

不可以無名因扁之曰翠屏云云○附知縣夏國孝訪玉泉詩一絕赤脚尋山踏雪苔雪窗何處覓殘梅主人深着東園鎖靜日孤亭密撥灰○訓導鄧程訪玉泉詩一絕河橋無柳識神仙偶入天龍便悟禪三十六玄談未了又從川上看魚鳧

澄慮軒 在教諭宅後

仙釋 仙釋之來遠矣其偷生綠業之教感民為甚然史家皆存而弗削者亦齊諸志怪之類耳茲故因而志之以著習俗之所尚而君子之所當關也

七娘 同心七女在縣東八十里山中修道後同羽化登仙其山以此得名至今山有鞋跡七雙為驗

月仙 兄弟五人修道功成雲遊方外誓曰見險過見月止至羅過石險登一大山遇月出遂止居之五人同戶解矣其山後亦以月名今立有廟

盤仙 本縣平湖鄉七十里有港半畝見一人浴於中忽爾不見其人止遺下盤跡乃知為神仙也故其港至今以神仙名

麻姑 縣東八里有崖一處麻姑會寄跡修道故崖亦以姑得名

惠旺 本縣多雲人自幼參禪教初不識字一旦入多雲深山之巔創庵靜修杜絕塵慾遂脫悟於詩寫盡高山情景詩一聯曰流水響穿崖下石白雲堆堵竹邊牆又一聯半夜犬從天上吠五更雞向月中啼禪機之能移人如此竟坐化於山

祖寬 鳳陽人年九十四遊至本縣塔山寺謂主僧元慶曰此地五祖家也願借尺地西歸慶駭之問曰汝果知輪迴之說歟曰吾不知三日後辰時吾歸期也至日果坐一蒲團請大眾說偈曰九十四年駕隻鐵船一篙撐去徑往西天言畢而

氣絕矣兀坐如生一方人異之

羅田縣志卷之八終

吏聞尚明謄錄

## 羅田縣志後序

予行天下其所閱歷亦有方矣每見幽奇之觀瓌偉之跡英雄豪傑經綸馳騁之區未嘗不褰裳引領神爽飛越直欲陟其巔拜其壘徘徊數日而後快壬寅之春就官于羅欲以觀風察俗尋幽弔古至之日求志觀之久而未能得既而乃知舊典之不修而新帙之未就也居踰月祝公

欽擢之命下矣一日始出其稿以相示曰茲蔡惟忠輩二三子之所成外史楊君洪君之所校而余亦嘗是正者也顧楊君以陞去余方以取行其間綱領粗備而繁漏未釐子其爲我終厥志焉且並其所以鉅梓之費咸預以畀予予曰於至哉公爲政之忠也去而不忘其舊爰披而閱之見其大書分註井井有條搜逖索幽百爾完具乃歎曰甚哉二三子之苦心也於羅有助矣予復何言特卽其所分六曹爲之離合而更置之重定次第參附意見哀繁增遺別爲八卷不越月而事畢乃募工板行僉謂予當序諸末簡予惟在昔韓昌黎過韶州借圖經朱子官南康首

## 縣志後序

問郡志羅地雖小亦古之建國也而舊稿破裂邑之故實幾落莫無稽陋也若何今公能以數百年邑乘之闕而頓舉於數月之間二三子能成公之志蒐輯抉摘於文逸獻亡之後而余復濫預編摩之責安有所易置得附名於圖志之末是書之成亦不可不謂之遭也已繼今牧民者能留意而踵修之使從政有稽觀風有采尙友有徵於以宣

皇庥敷教化豈其微哉乃不量而書於後

嘉靖壬寅夏六月儒學教諭晉江蔡元偉謹識

購鈔天一閣藏本嘉靖羅田縣志題後

庚申春余校書國立圖書館吾兒夔強相隨特喜訪書一日語余曰吾縣有康熙四  
年所纂之方志比於繆藝風學部圖書館方志目見之鈔本八卷二册署王光鼎修  
大人曷於圖書館檢之余驚爲創聞先詣教育部藏書處得寫本內閣庫殘書目載  
有此書別有康熙五十六年張侯琳之志刻本五册詢所在則二志均已劃歸圖書  
館夔強極思快覩欲爲錄副余迺泐秘書廳行調數日二志均至始知繆目署王光  
鼎者乃其目例皆以官爲主名實則此志乃王宰縣時屬故明諸生蔡容遠梅山手  
纂館藏鈔本二一署內閣一署禮部其書並未付刊均縣管所繕當時由縣申省送  
閣部圖書集成職方典所採卽是此書近志於容遠傳有修志語乃謂此也強兒與  
其弟夔武錄此志訖更錄張志惟張志之在吾縣自光緒初管侯修志時便不獲見  
更無論蔡志今始得而並按之張書亦據蔡志爲藍本貳以康熙二十四年奚氏祿  
詒所修之府志參以諸生汪德溥之訪稿是時縣紳自徐教諭鉅閔訓導煜以下但

### 重刊祝志題跋

充採訪讐校其討論編輯都由張侯幕客劉青震等十許人主之吾兒既得此二志  
始與余商欲訪求嘉靖祝侯創修之書蓋余居恆嘗言此志今日容在世間也始余  
讀光緒府縣志秩官傳知范氏天一閣藏有此志欽欽在懷嗣聞范氏藏書經粵匪  
亂時多佚疑此書亦在列久不置念比經兒力言怦然心動於是求得薛福成天一  
閣見存書目觀之則此志赫然具在並注嘉靖壬寅祝瑀修下署一全字覽之大喜  
自夏徂秋在京師詢寧波人殆徧展轉動多間阻最後由陳君文哲三四次函詢越  
年春暮始得范君玉森復札其人爲范司馬嫡裔見以國民校長司全閣總筭鑰稱  
曩例購鈔一種須銀元五十番余乃商之縣會館諸君乞勸學所鳩資勸學諸君深  
知文獻之重三閱月而資至范書亦來謂按元款式影鈔已竣惟彼此乍行交易各  
有不相信之苦遲之又久余始決意先郵值予之乞一周星而此書至余父子分册  
檢校列其譌奪並災異中缺葉縷寄乞其訂補惟已脫之半板元藏本已付闕如強  
因告余可以蔡志補之蓋經校以蔡志知蔡氏於嘉靖以前及志例全襲用此書但

竄易舊文少許字句耳爰遴災異中四則補入此書遂哀然爲完秩矣方余父子訪  
購此書時夔強正代人搜求鄉先正著述目又於黃氏千頃堂書目卷七見袁福徵  
之羅田縣志加以推考疑爲嘉靖四十一年袁氏官黃州同知時所續輯後於此志  
裁廿年然其書則無從跡

或云袁志即祝志不過即元書加入序一篇據千頃堂書目亦載袁福徵景陵縣志惟今天門縣志稱即邱宜之志謂時縣志久缺宜始創修知沔陽州華亭袁福徵爲之序然則袁不過於邱志加刊一序而已千頃堂書目即據序以爲袁修准此以推所載袁氏之羅田縣志焉知非即祝志而袁氏爲加一序因而黃氏遂著錄爲袁氏修乎且黃氏目注此志云嘉靖間修殆即指祝氏壬寅歲耳否則相去廿年可增補者無幾奚必再修其必曰嘉靖間修者指明修書與袁不同時耳又有一證嘉慶中何文明爲清川縣志未幾縣人潘煥龍知縣事爲加刊一序撤去舊日序例印行儻不加考覈鮮不以此志爲潘修者然則黃氏以祝志爲袁修者殆亦此類爾宜顧亭林請有明一代著書人多撰竊也又葉廷瑄吹網錄稱至崇禎十一年江津白侯乃忠之續志吳曉鉉言千頃堂書目題撰人多附會不足盡信觀此益信

按宣統湖北通志藝文外編稱是志在崇禎九十年間其說是矣而向未盡考九十年間白侯築城練兵至劇十年二月及四月大小乃有十一戰決無暇修志惟自此劇戰賊衰入秋多方可議及修志當時必是一定議即以凡例乞序於李夢白家宰故其序但述白侯美政不詳其書若何可證十年間志尙未成故家宰雖沒於十年尙及序是志也若梅長公之序亦是未見志所作故於書從畧亦必作於十年十一年間惟晏元洲序曾見其書故論志較詳晏是時方家居也特訂通志附辨之

與蔡氏之纂志相去不及三十年中間雖經流寇再三破城與山岩義軍一再收城其書未必卽至銷滅淨盡乃蔡氏與所採之祝志均不一齒及殊不可解豈此事可以隱沒前功悉歸美於一己耶矧蔡氏修志十九藍本祝志既有較遠之志豈無至

### 重刊祝志題跋

近之志意者蔡氏於嘉靖後採有白志乎由此言之則白志亦殊略矣

據李孟白序云武志也及晏元洲序

云表揚新績又云侯之功惠大書特書則是志宗旨全以紀白侯功績爲重他皆在所輕故多畧也且是時舊稿悉燬於八年屠城之亂亦不能不畧及張侯修志但視蔡志爲草創

之稿頗不許爲具體之方志爰再四搜索白書其凡例但云蔡生所紀

例言云職官選舉人物據蔡生所紀

實則各門均採蔡志但益以公典檔册採訪稿其不認此次爲志者特欲以創志自居耳觀其序可見又云成書後復得有名舊序三首徧索底本僉

曰委實無之縱留一二斷簡已不成篇句審是則白志在張侯時尙有斷簡知其

蔡氏時或不止於斷簡殆其人年高志荒力避鈎稽攷覈之煩惟以因陋就簡爲心

其因襲前志者兼以其書有厥祖之餘緒其後只摘白志完一朝大略耳要而論之

如果袁氏祇序祝志以行蔡氏果已包白志在內是此二書一則無所謂亡一則亡

而不亡矣卽不然二書與祝蔡書有別在今日海內殆已久蕩爲寒風黃埃不復可

問考明代吾縣志行於各省者止有祝志曹學佺天下名勝志所採即此志願氏郡國利病書所採有出至最近之姜祝志後者殆本邸鈔顧氏方輿紀要亦參有他地志餘則不出此書外白志與國同亡更無知者矣

管二志皆書則盡人皆知若姜志成書在乾隆五十三年爾時亦未付削及咸同兵

燹中原稿由房書檔册中流散人縣市私家適練局中人見之乃以活版印行數十

部於是遂爲光緒志一切之母惟其書始終未達之大府暨各官署又無修書序及年月故公家都不曉有此作觀於光緒府志收入屬新舊志目宣統省志收各州縣志目都不及是書從可知矣綜吾縣自有此志以來都凡七次除袁白二書外余父子遂盡有其五種而吾之知有此最初之志自光緒府縣志發之近年之立意購鈔此志由強兒得蔡志張志後始決心誠求得之而由此五志互參所得於吾縣文獻故事之真者遂特啟一生而矣更拓而求之此五志外如自來舊新之省府志並一切海內諸志其關於吾縣放佚之文獻余父子校書時所得又更不可枚計矣嗟夫吾兒以甫冠之年其奮力思効於父母之邦較耄耋修學之儒爲尤勤摯而恢廣胡乃遽奪之去使吾遲暮中日日抱孤立無助之傷誠無解於造物者是何心也已甲子秋八月里人王葆心記於武昌國學館之天心國命堂

余父子之鈔訪諸志既艱困如此今悉言之者冀吾縣人聞之此後共矢加意之永保勿任再佚耳惟祝志既得嘗恐縣人疑余將專有其書時思廣傳適吾癸卯房師

### 重刊祝志題跋

三

李心蓮先生奉檄爲羅田長是爲余挾此志南下之次年乃作公函賸是書乞携入縣解存諸卷冊函中深致意縣人望其永遠保有師既抵任旋枉來書欲割俸重印以廣其傳是時吾兒尙未病聞之深喜卽爲考求此次修書諸官紳羅其生平本末輯成附錄一卷付從孫學博寫之以揚創志羣公之美同時又立綱羅舊縣文獻三目曰鳩茲文在曰鳩茲詩在曰嘉靖羅田縣志訂補越兩月遂一病不起矣自後余更束閣不忍復觀洎甲子秋師以印費來始督武兒再檢舊草十月爲武娶婦携以返里又得近籍中宜予訂正者二事一宣統湖北通志藝文外編據天一閣目收此志譌名爲翊又引千頃堂書目之袁志稱羅田志秩官不載福徵名與祝志是一是二無從稽考余謂此由不知福徵乃以部官預屬縣之志並非縣官之自爲志羅田志自不當收其人入秩官祇可收其事入秩官傳若袁之與祝相去二十年自是二事前已言之矣一湖北書徵存目載蔡容遠康熙羅田縣志八卷注宣統志知縣張琳修北京圖書館藏本蔡容遠修此誤以兩志合爲一書也蔡志鈔本八卷二册乃

知縣王光鼎所屬修繆目已明書之余定名曰康熙羅田前志張志刻本八卷五冊  
乃琳瓊劉青震等所輯內閣庫殘書目亦收入余定名曰康熙羅田後志書徵合而  
一之非也又他日著錄之譌如繆氏方志目以蔡志爲康熙十三年寫本已誤而內  
庫書目又以爲康熙六十年刊本則更誤庫目亦是以張志淆入蔡志然張志亦五  
十六年刊本非六十年也凡此皆考求吾里方志流別所不可不知者也是歲夏正  
十一月葆心再志於青垞新居

抑吾更有不能不爲吾里後賢正告者從古知人必先論世今試取康熙前後二志

論之則蔡氏所處本非其時

黃本誠新鄭縣志凡例曰昔顧亭林在永平或屬爲府志亭林謝之曰郭造卿在  
威將軍幕府搜羅天下書志畧備蓋十年而成燕史而今無其時故也大都取成

於數月之內者耳按湧幢小品稱郭山人造卿號健初福清人葉臺山爲之傳其燕史勛  
畧皆有成書故亭林稱之余謂亭林爲一代理志開山之祖故取其言以斷志書得失

張氏得時乃復反主爲

客故二志之不鑿人意者大都以此夷考蔡梅山修書之時當流寇山岩饑疫子遺  
之餘村市荒殘不堪寓目其時不但官家舊族之寸楮掃地無餘卽前明畧可諮詢  
之文士亦寥々無幾卽有一二均在劫後拋殘之地甦息耗邁之年而梅山亦耆年

### 重刊祝志題跋

四

以上人經生舊業不究紀載體例不曉當代掌故倉猝修志刻日成書向來既無儲  
備臨事更憚尋求除鈔此志及續以白志外苟再徵事實在當日者祇有流俗之野  
言與夫荒唐之陋牒故梅山摭入之新志材率開後來縣書之陋習貽鄰縣人以笑  
口雖其萌亦開自此志然此志但蠹一孔未至如蔡之濫開多孔因此巨隙遂致乾  
隆府志之嘲譏靖果園特於凡例中摘吾縣志力詆而汰除之嘉慶湖北通志陳愚  
谷又遵而用之二公皆吾郡宿師巨儒也此則不得不爲梅山咎者若其亂頭粗服  
中之佳處其瓊寶尙多經張志誤會與妄削者尤不少若職方典之所採不過十之  
二三耳張侯修書主張全出外籍人不知此事苟非本貫宿士而又平日究心者往  
往動輒膜隔在張志之用意無非力矯前志之儉澁意圖拓充然拓充而不本於平  
日見聞之卓越羣書之淹貫則其臨時增多者悉是紙上之空文與他方所公共故  
其星野祥異乃入之濫人物列傳描摹空談爲名人改籍貫以陋譜爲寶書以排比  
廣篇幅以序論見文彩其取資於奚祿詒康熙郡志但欲詳於舊志而不顧其乖隔



職官一門之年代幾於滿局全輸其於湖廣通志大清一統志之屬似都未之見則又與梅山同病者也然其佳處如典制田賦人物藝文力求博瞻尤在能破明人方志之舊軌而從同於清代方志之面目其要處爲姜志不知而謬去者亦多此張志之功也故二志之短在限於時與隔於人而其長要爲吾人今日所當共寶者也若夫姜志則進矣以義例論其志六表二列傳二乃深合史裁以地理論則山具枝幹水析源流又深得古法其每門小序亦多具典要其例言深以靖氏府志據正史駁羅田人物爲是而姑以徇俗者免流俗之誦亦見其苦心調停惟最末辨疑之考證仍不免悍誕飾非其劣者則同治刊本紊亂其體例行款管志卽據手民紊亂者以爲典要尤爲駭聞此則最可憎者耳然則清代四志當以此書爲之冠矣良由姜伊蒿爲晉之通品當日預事之兩秀才四孝廉亦幼學之儒而承平之世公私不淆法度未墜亦其時也若管志成書當團練餘波分黨之後一二雅才復裹足不入局入局者復多以銷費爲心總纂諸人挂空名而已舉堂堂一縣宋元明清四朝文獻之

重刊祝志題跋

重典責之循例辦公之人又奚足論哉奚足論哉故余之跋此書也不憚聒絮析論以往吾縣書之得失非好自標置以敷說前修也爲鄭重吾縣文獻計爲普示後來鑒戒言出其心長語重之一愚不得已也後來者勉諸乙丑夏六月大暑再記於會城行館

按此次覆本係按天一閣影鈔明刻本傳撫元刻每半版九行行十九字其例仿明一統志大書標綱分注列目之式易一事再提行標之次行均低一格以醒目今悉因之其志中缺畧處爲脫處並確知其誤會處先後鉅錄處均一仍之不敢輒改但綴一語志其不台命變武據訂補爲之爲減少版資計縮作每半版十二行行三十二字官師志歷官一門人物志舉貢二門元本祇占半截今疊作兩截以省版數讀者尙可據以想見元本面目惟元卷首之縣圖拙澀無法亦不標地名無從識別無取覆摹第學宮縣署二圖雖亦簡穉然按以志中敘列尙可考見嘉靖以前兩種建置之規制特詳加考定拓元半版一圖爲一葉一圖熊君炳衡爲摹繪石印並一一注出堂廳房亭廟祠廡門宅庫等名望之了然觀者如

置身嘉靖之世不亦快哉全印既訖適夔强家傳脫稿每念此志璧返吾縣渠頗盡力羅致加以讐校並康熙前後二志亦手寫全部歸之吾縣三年中研考縣故尤費苦心爲本縣平添歷史中無數聲價讀此書者容亦在想見其人之列特取家傳附末識者鑒之或不斥其阿私也耶然繕附錄之從孫學博已於六月十五日在廣東軍官學校助戰殉國亂矣哀哉

正籌附印間適沔陽陳桐如縣長侃瓜代屆期亦聞此事特割廉俸捐助印資俾此書多留幾十冊散布世間高誼良足佩也特並志之

重刊祝志題跋

重刊嘉靖羅田縣志附錄

此次修志職官人物列傳

縣人 王夔強 仲立

昔章實齋修志必舉前志原委列諸叙錄蓋仿史漢叙傳之例重志原也吾縣在宋元時隸歸蘄州則溯圖經之原亦必於蘄州志求之輿地紀勝載蘄春志丁光遠編茲殆吾州有方志之始宋史藝文志亦收此書凡十卷作陸峻丁光遠撰惟二人之里籍爲本貫或客官都不可知元李衍竹譜詳錄曾引蘄春地志述竹產自羅田殆卽本陸丁二氏之書書在元代尙存而當日羅田之事可知卽在此志中矣考祝氏此志山川中虎母山下曾引舊志云云坵墓又云因舊志以書豈此志之前先有一志乎然細案之所云舊志者殆指玉泉芝麓諸公舊稿而言非更有一志在此志前也祝侯序所謂志稿蔡氏後序所謂舊稿卽皆指此此其稿要與宋元蘄春志無涉比在京師聞諸故老謂永樂大典收宋元地志甚夥丁氏之編容在其中惜乎庚子亂後鴻寶散落今既不復可問其可窺見一斑者祇宋

重刊嘉靖羅田縣志

附錄

之方輿勝覽輿地紀勝明之寰宇通志爲其最古者耳方祝侯修志時除省郡兩志外如上所舉之三書都未暇考亦更何從遠溯志原然猶幸當日官師與三四學者銳然創立其開始之功又烏可沒哉欲彰其功斯不得不重其人夔強幼學無知每有綜述取裁庭訓特舉在都門讀方志時積年所得凡屬諸公之生平彙爲一卷竊附諸章氏敘列志原之旨鈔列此志後異日儻獲重刊焉亦應有之表章也癸亥三月縣人王夔強

周英忠州人宏治十四年辛酉科舉人

右嘉慶四川通志卷百二十六選舉明舉人

夔強按忠州志有周英傳惜未鈔得

勞樟列傳

勞樟字奇材正德庚午舉人授萬年知縣勸農講學剔蠹綏良調羅田南陽盜發築城死守有保障功後補新淦以按豪猾被誣下獄尋得白陞贛州同知奉命督木卒於道羅人思之祀名宦

崇德新志

右許瑤光緒嘉興府志卷六十石門列傳

夔強按崇德因避清太宗年號改石門

勞樟浙江崇德舉人嘉靖十二年令淦性樸才練為政務慈愛督賦明罰適於寬猛塞干祈除浮費民受隱福近候梓宮夫征不擾任八年如一日秩滿行民繫思焉終吉安同知祀名宦祠

右陳錫麟同治新淦縣志卷六職官傳

夔強按樟以嘉靖十二年令淦則任羅田在十二年以前據與淦所撰去思碑蓋以九年莅羅田惟嘉興府志作終

贛州同知而新淦志作吉安當以嘉興志為確

陳瓚字芝麓福州府學閩縣人沔陽直隸州學正明子正德五年庚午黃廷宣榜舉人黃州府羅田縣教諭

右陳壽祺道光福建通志卷百五十四選舉志明舉人

夔強按祝志及蔡志均作懷安人張志以下沿奚志訛作淮安考懷

安為明福州舊縣至明末裁併地分隸閩侯兩縣然瓚在通志作閩縣人不書懷安人可知祝志作懷安人乃誤記當以書閩縣人為正瓚既為正德舉人則張志以下誤作宣德間任乃沿康熙黃州府志而訛不可從考明代福建陳瓚有三人此為閩縣之陳瓚辨見家大人窈齋舊話惟潘氏臥園詩話以瓚為羅田知縣誤

趙廷佐字南濱桂林人廣西通志選舉正德二年舉人文昌教諭

表作臨桂人

### 重刊嘉靖羅田縣志

附錄

右鈔本程可則康熙桂林府志選舉明鄉舉

夔強按祝志作桂林中衛人而臨桂縣志列廷佐名則由中衛改入臨桂縣籍也屬桂林府考臨桂

舉人明代官吾縣教諭訓導凡三人自廷佐外則楊鸞熊炯也廷佐既為正德舉人則張志以下沿康熙黃州府志作弘治間任誤甚不可從祝志稱廷佐以考滿去蓋以訓導考滿升文昌教諭也

祝珣列傳

祝珣字珍卿太平人福建按察司副使戒之曾孫也少從章文懿公受易得其詮要為文務以理勝選隸學宮儕輩咸下之以貲入北雍中順天壬午鄉試屢上春官不第歎曰丈夫欲白樹奚必擇塗而趨哉遂謁選授孝感令尋丁外艱歸服除補知羅田羅田介萬山之間民皆獷悍而負險絕為暴客藪珣至則食咄寤畫殫圖宣猷視民力所急民財所詘而煦嫗樽節之穀其良而摘其惡無賴者邑有大猾根株盤固更數令不能治珣廉其諸不法具獄磔於市里社乃安時屬歲稔而世廟且南狩所過空村倒困則舉棄室廬而逃珣於諸應費並從節縮復訂供帳簿要請於有司不得溢數而濫索省十之四次夏又飢民之殍於茅篁砂礫者比比相枕籍珣便宜發粟以賑之戶分別大小以為給多寡而復禁閉糶通稅以長活者殆萬計屬郡盜

燦起赭衣白晝剽行聚落顧數討數叛迄不能底定珣決策曰邑聯英六淮廬之鄙帶商鄧汝息之疆地險阻民雜遠不逞類有所主故能為變耳乃密緝姦孽為內應者十餘輩當以常刑尋餘黨復囑聚壘於崇巖之巔席險負固以稱亂珣圖六關形勢坐而籌之謂四陲懸絕彼以地勝固矣然周而夷曠者非盜有也乃移檄徵諸路兵襍牙誓師犄角要害厚集兵力奮距而直薄之元惡授首羣從即戮覆其巢而返旆百餘年盤結之寇一旦殲之無孑遺當是時湘藩言善政者必首推羅田令他郡邑間有滯獄疑訟久不決者皆願屬羅田令決之片言所折兩造允服臺省交薦徵入公車而銓司固泥資格僅遷同知武昌珣不以是不滿隨牒效職如令於羅田時擢刑部員外郎尋丁內艱服除當補乃抗疏乞休歸珣居官嶄然所至以介潔自標尤約已務施於親族多所資給或有負者每折券不責其償與人懇款見情愔然一軌於正不為媮爛猥瑣之習居家植德者十餘年而後卒年七十有五

右徐象梅兩浙名賢錄卷十九經濟列傳

變強按湘藩乃明人稱湖廣布政使通用之語若在今日當作鄂藩又自蔡志以下均誤珣作翊光緒黃州府

### 重刊嘉靖羅田縣志

附錄

三

志同惟康熙黃州府志不誤

神珣江西舉人嘉靖中知縣峭厲有鑒裁庭無沈寃志操耿介有清名

張志

右沈用增光緒孝感縣志卷十三名宦傳

變強按珣浙江人此作江西誤

章懋德懋楓山蘭谿文懿學派神珣珍卿蘭谿章氏門人

右萬斯同儒林宗派卷十四

變強按萬氏載章氏門人凡十五人籍蘭谿者七人

神珣字珍卿少從章楓山受易後入太學嘉靖壬午中式授孝感令尋丁外艱服除補羅田令縣介萬山之中民習獷悍有大猾根株盤固珣廉知具獄磔於市時屬歲稔上方南巡珣於諸應費力從節縮曰寧罷官毋乏困我百姓復訂公帳簿請有司不得浮數溢索約省十之四屬郡盜起白晝剽掠珣密緝為內應者十餘輩移檄徵諸路兵選精銳直搗其巢百餘年盤踞之寇一旦盡殲郡賴以寧他郡滯獄皆願就羅田請平擢刑部員外郎尋乞歸年七十五卒祀鄉賢

右沈麟趾康熙金華府志卷十七明蘭谿縣人物列傳

變強按斐天錫康熙武昌府志卷四秩官武昌府明同知祝珣南溪

人舉人考南溪  
乃蘭籍之謫

### 楊鸞列傳

楊鸞字伯鳴嘉靖戊子舉人任銅仁府通判歷官二十餘載清貧不異寒儒引疾乞  
休閉門謝人事對妻孥雖大暑未嘗去冠處鄉人雖狡童亦不失信

粵西  
文載

右胡虔嘉慶臨桂縣志卷二十八明人物傳

夔強按張琳康熙後志職官沿康熙黃州府志之  
誤作楊變秀水舉人以後諸志沿之亟應訂正祝

志稱鸞以升去蓋升府時令也與臨桂  
志書知縣合其判銅仁由知縣升也

洪炯字國曜桂林人嘉靖間府學貢生仙居教諭

右沈伯棠道光歙縣志卷七之二選舉志科目

夔強按桂林乃歙之鄉村名炯既為嘉靖間密  
國府學貢生則不當於正德間官羅田訓導張

志以下沿黃州府志作正德任誤甚祝志  
稱嘉靖十八年以升去即升仙居教諭也

### 蔡元偉列傳

蔡元偉字伯瞻泉州府晉江縣人宋蔡襄之裔總角時已有孝弟稱為諸生見程端  
禮家塾日程皆宗朱子教人之法歎曰學當如是即手鈔服行慨然有求道之志嘉

## 重刊嘉靖羅田縣志

附錄

四

靖辛卯舉鄉試需次入京同邑周天佐以疏救楊爵瘐死獄中人莫敢視元偉哭臨  
之且作文以祭授黃州府羅田教諭其教士即舉業中默誘以聖賢之學擢知德安  
縣一以節愛為本每退食取小學近思錄伊洛淵源錄及薛胡粹言揭觀成誦即升  
堂又袖以出曰誠慮心官少放行事過差以此當嚴師良友也遷杭州府通判時倭  
寇方熾元偉乘城開門縱避寇數千人城賴以全趙文華視師至嘉興檄元偉督軍  
餉人或勸之求通元偉曰死生榮辱命也吾旨以貨免乎卒不往入覲乞終養吏部  
尚書李默知其賢命考功留之擢撫州同知巡按檄督樂安通糧樂安素頑元偉寬  
其鞭笞輸納轉勸無何樂安有劫庫之變再被委往忽流氓數千焚掠南豐等鄰邑  
樂安故無城元偉召鄉民精銳者設險扼隘賊不敢近縣獄久壞風雨莫蔽時蒸糲  
疫元偉欲作新獄居之縱囚歸命獄成至囚並如期尋丁父憂喪畢以泉州倭棘墓  
考亭遺跡遂移建寧元偉學尚程朱而重躬行其所致力惟在飲食衣服男女起居  
動靜語默辭受取予之際作日歷自識平生名考德錄而自序之曰松莊子少不自

揣非聖賢書不觀非孝弟志不存非天地古今之運化英雄豪傑之作用無以入吾思也氣拘物蔽鞭策不前悠悠作輟出入是懼於是是有是書之作吾之考德有二一則時常省克而時識之以自稽其理欲分數之多少一則隨其學之有得心之有開即便劄記以驗器識之高下淺深以為進德之助不有得於今必有得於古不有合於人必有合於天則所謂不知不愠之地或可萬一焉其云松莊者先世名思者在宋時家郡城外十里許繞宅皆松王十朋守泉州時題為萬松莊元偉取以自號也同縣王國輔字忠甫受易於元偉又與何焯為友研究精深動履繩尺元偉以女妻之元偉無子將沒作訣書割田遺國輔國輔不受

右陳壽祺道光福建通志卷二百十二人物明儒林傳

夔強按福建通志經籍考元偉自考德錄外所著有易經聚正四書

折衷二種

蔡公元偉字伯瞻宋忠惠襄後忠惠兩守泉州其三世孫櫛再蒞是邦四世孫思因家焉公幼有孝弟稱既為諸生憲副方豪延為弟子師見程端禮家塾日程皆宗海

### 重刊嘉靖羅田縣志

附錄

五

翁教人之法歎曰學當如是即手鈔服行領嘉靖辛卯鄉薦授羅田學教諭凡所教士即舉業之中默誘之聖賢之域擢德安令一以節愛為本每退食必取小學近思錄伊洛淵源錄及薛胡二子粹言揭觀成誦即升堂亦裏以出曰非曰忘之誠慮心官少放行事過差以此當嚴師良友耳一時政事真有得於學道愛人之遺擢撫州同知巡按御史委追樂安通糧不加鞭扑皆相繼輸納流賊焚掠鄰邑自著戎衣演武教場賊聞不敢犯縣獄久壞風雨莫蔽公將新之縱囚歸家命獄成乃至囚至期悉集復委著崇仁崇仁無城賊突至督兵合戰數日皆遁去丁外艱葬畢以泉中倭患募建寧有考亭遺風遂移居焉公學向程朱而重躬行其所致力惟在飲食衣服男女起居動靜語默辭受取予之際其自治之勤或至提繕少懈過失復生輒撫膺泣下長跪自罰著有四書折衷易經聚正若干卷又著考德錄自識生平行事號松莊子

右張伯行道南原委卷五列傳

夔強按此傳大畧與閩志同而有加詳處故並錄之

蔡元偉晉江舉人嘉靖二十五年授德安令深慨安邑衝疲多方拯恤申革潯陽支應力請協濟以蘇民困朔望詣明倫堂講書詳訓不倦建書院立學田修邑志勸農桑折鄧乾五劉厚八難決之獄勦李景鋒鄭玠猖獗之寇拜火返風禱雨輒應橋梁舖館燦然一新嘗署其堂聯云憂民催白髮學道悔青春未死不休存省力當官皆是進修時歷任七年遷杭州通判再遷撫州同知後以公事過縣士民聞之踴躍奔迎者不絕於道

### 右沈建勳同治德安縣志卷八名宦傳

變強按傳中所言修邑志即倡修德安邑志今尚存其概畧如祝志之體惟此志初稿係按六典立目其例殆訂自玉泉

諸公至松莊乃離合其六典而更置之觀後序可見其意蓋以明一統志之體改易元例意主尊王其主簡要削奪從嚴當本於祝侯用其師闡發志之旨由今按之用六典之體修志章實齋亦發其旨至鄧湘皋寶慶志則選以六書爲目矣是玉泉師弟之法本自古雅其可惜者莫如過求成削如藝文中文詩公署儒學古蹟寺觀祠宇中諸記及詩皆削不載至今日一無可考則成削太過之病殊失修志本意矣又松莊先修羅田志見羅人以王詔爲縣人及修德安志則王詔爲德安人十分確鑿可據回思羅田人此種附會亦太無識當自笑前此之失也並附志之

蔡元偉福建晉江人嘉靖中爲撫州同知著樂安縣事流賊數千焚掠鄰邑樂安故無城元偉卽簡丁壯據險設守賊聞不敢犯時獄舍久傾會大暑疫作元偉欲新其

## 重刊嘉靖羅田縣志

附錄

六

獄乃縱囚還家獄成囚俱自至後署崇仁縣事亦無城賊突至元偉勒兵出戰斬賊數十賊懼引去按一統志補

蔡元偉福建晉江人舉人嘉靖五年知德安縣事縣故衝疲元偉多方拯恤申革潯陽支應力請協濟民困以蘇折獄勦寇治聲卓然遷撫州通判九江府志德安縣志

右曾國荃等光緒江西通志卷百三十卷及百三十二卷官績錄

### 張明道列傳

張明道字希程奉泰鄉人生有異相儀容魁奇姿稟特異以歲貢生中式正德八年癸酉湖廣鄉試第五人次年上春官不第乃慨然曰今日友天下士既不愜吾意吾其尙友古人乃潛居於塔山寺之西樓篤專古訓鍵戶數年未嘗以半武履公庭後進來及門者必有以鑿其意以去時通判蘄州毛應時蒞縣霍山知縣王祿汝學以公事來會見明道皆傾倒兩人在西樓相謂曰希程經濟才未可以科自中人測之因相與登樓索觀其筆劄著述則皆足發賢儒之蘊應時爲撰翠屏樓記以志佩仰



羅田官師夏國孝鄧穆時過從與講學周英勞樟後先令羅田歎自有縣以來缺方志始與明道商權編述於是始有初稿卽後來祝珣所據爲底本也凡五試禮闈至嘉靖八年己丑始於羅洪先榜登第官都察院都事與御史崇陽龔澁同年同官雅相善以直節相砥礪澁在南臺以風力振一時明道亦以上封事忤直觸世宗怒拜廷杖旋謫南直隸滁州判官時嘉靖十二年也甫至值知州臨海林元倫述職入都明道卽權州篆在官以儉約刻厲自振攻苦食淡聽政有暇輒造醉翁亭嘯咏其下並度地築梅亭於其傍明年遷吳江知縣其治吳江也以地居東南望縣歲糧至五十萬石前令之弗軌者取於掌賦者以爲常例承貳以下轉相仿以責之長長科之民久之而官民交弊明道至則手爲文以誓於神曰某所爲不與民同心者有如日貳以下皆爲之悚動縣有豪右橫甚下車時卽誅治其桀黠餘皆斂手充皂隸者例納銀入官明道曰若曹亦有家傭其身而受其值於義何居與其受值而縱令梗法曷若反之而法之不怨乎遂還之其年適大旱明道引爲重憂露禱於天凡縣之百

### 重刊嘉靖羅田縣志

附錄

七

神在祀典者徧禱之期於必雨已而果雨民既感其誠然禾之秋成者祇及半乃告災於大府以聞於朝臺檄吳縣朱知縣廷臣來勘而命明道轉勸吳縣朱夙以公清著先至則悉命民羅拜馬前復爲之請曰民病矣願公寬一分某亦不敢負若民也縣當孔道使節旁午餽送無節少減則謗譟煩興乃一切爲裁省有讓之者則曰寧我受譴剝民以求名吾不忍也嚮之公私宴集窮極豐腆則懸格以禁之而鄉之里長城之坊長其役費十常減六七貧賸貸於豪右積久缺償往往以徧避流散明道爲設法招徠復業有以訟至今自拘審非大故不出差鄉民輒終年不識吏役面或骨肉忿爭則召令至庭以至情曲爲剖諭令感悔乃已不輕施法也朔望視學進諸生與談經義刺刺作家人語諸生庭謁雖少年必假以禮貌有不得已事許其自白務達其情遇之從厚城鄉學社久廢乃以屬縣丞李文瑞普加修緝申蒙養教條學僮在校仿古制禮衣衣之曰童子衣遴鄉師尤慎不時往臨之察其良楛而申戒之祠廟橋梁之不飭者曰此一邑之儀觀也不宜以俟後人所在均繕修完好然必因

事興工及成而民不知費也縣舊有仙里橋民傳爲陳昉陞仙故蹟乃卽其上建仙跡亭泐昉詩及朱子小學所載馮球事揭榜楣間以示董勸縣人立三賢祠以祀宋儒王信伯師弟請於明道爲文以記其事有一貧嫗鬻其孫償官逋值入手復失一孤兒以官逋被繫明道皆爲代輸他所惠周無告者不可勝舉爲政務持大體不拘牽文法大要以崇儉厚生陸倫敦化獎進人材而彰瘡善惡嘗曰人生所享有限何苦子子爲子孫計故所得俸資常不令有餘凡賓禮及歲時慶弔皆出己費不煩民間一錢以故始終一節廨舍罄懸薪水或時不給家人不堪明道不顧也瀕行止携來時雨敝籠而已性極疏朗公暇如在滁時輒邀縉紳之賢觴咏於垂虹雪灘間盡歡而罷十四年冬甫及期擢刑部主事民奔走咨嗟若失父母有老人徐臬趙洪等相與乞於縣人陳策撰去思碑於三忠祠中則相謂曰自國朝以來號稱廉吏未有過於張侯者也既供職北都歷員外郎陞郎中十九年外擢浙江紹興府知府前任爲安岳湯紹恩愛民而好興作明道繼之無所更張務與民休息立名義以爲治率

### 重刊嘉靖羅田縣志

附錄

八

其慷慨峭直之性臨事不拘繩墨每聽訟獄輕重或不可測間亦流露玩世滑稽之意士人呼爲張顛然實非顛也浙之士大夫羣推其學博窺經史尤深於黃老之意第蘊而不輕發露遇諸生訟或抱牘立庭下先與論說古今談言微中卽判狀爲白之否則訶誚立至揮之使退門牆務爲寬大不自居黃堂尊貴民之視之嘻嘻如家人父子了不見其可憚郡俗歲正上元燈火殷盛明道輒偕郡僚角巾雅步徜徉觀燈于市見者亦不以爲異署中有亭在臥龍山巔明道在任一切縱民登眺無禁也後之追論當時治郡者羨爲羲皇世界故老每咨嗟談之嘆後來之不復睹云正德間嶧縣夏雷官羅田有政績嶧爲郡之屬縣至是遣人葺其墓而表之三載任滿民復伏闕乞留再任擢分巡江西嶺北兵備按察使司副使明道之簡分巡也始部擬以按察司僉事爲提學道及謁選吏部尙書見其儀表謂爲鐵面劍眉宜寄以兵權必稱厥職明道出語人曰人貴自立勿以形體爲人限量昔我阨窮時人謂我饑頭鼠耳今又稱爲鐵面劍眉夫豈果有以異人哉二十五年赴贛州履任時巡撫贛南

都御史爲長洲朱紘頗有聲而明道前任爲江陰薛甲以懲郡中嚴黨之奸忤相嵩  
譴歸明道知非可與爲容者甫數月遽請告歸歸後講學於塔山書院卒年七十三  
蓋自其少時便負大志視世利如敝屣與羅洪先唐順之同舉春官皆以倡明道學  
爲己任明道專以朱子爲宗於並世起象山之高恣傳爲新建之言以動天下者雅  
所弗取歷官二十年布衣粗食如寒士門人最著者胡明庶萬全萬言策蔡惟忠等  
所學博通經史著有學易稿詩經發蒙春秋大旨朱子綱目發明行世始讀書於治  
西玉泉寺因自號玉泉學者即稱玉泉先生後以名其集舉鄉貢時名次於黃岡王  
廷陳廷陳狂誕詩文有重名年甚少於是歲以白衣魁經房敬明道兄事之今夢澤  
集中尙有同遊西山記正德十年方以舉人居長垣胡錠守黃州會流賊深入羅  
田錠謀之明道孰可任勦賊者明道以張正福薦即命其督鄉兵於是正福率其弟  
及諸從子追賊大創之卒以反鬥並殉死及明道晚歲歷覽山水憑弔故人有詩悼  
正福甚哀羅洪先本與爲同歲以講學相友爲明道象贊仿紫陽之稱溫公謂其德

### 重刊嘉靖羅田縣志

附錄

九

業文章可法可則又謂其爲振古之人豪崇祀府縣鄉賢祠孫邦祥字雪村縣諸生  
有才名邦靖歲貢生萬歷九年官浙江嘉善縣主簿十一年以憂歸嘉善人甚嚮之

據祝志蔡志張義川書院志及萬歷康熙吳江縣志萬歷湖廣總志光緒蘇州志  
光緒蘇州府志康熙紹興府志同治嶺南志同治贛州府志康熙嘉善縣志等書修

#### 右列傳縣人王葆心纂

纂按家大人此傳初稿在義川書院志明山長表傳中此較詳故取此又考明道  
歷官年分各方志多異同濠州志稱其嘉靖十四年誦判官十五年去任然以萬歷

吳江志所載去思碑觀之則以十三年莅吳江以十四年去官當以碑爲最確則其官濠州必在十二年以十三年  
莅吳江也紹興府志稱其十九年任知府濠州府志稱其二十五年任嶺北道則其在紹興凡七年然紹興志又稱  
其下任陽湖蘇州廿二年任則又與濠州志不合若蔡張志稱其留濠州任九年則傳聞太誤矣實則以志按之祇  
數月故與後任內江高世彥同歲在任也凡此皆年月之亟宜訂正者蔡志張公祠之說紹興志不載知亦是誤傳  
又郭璠康熙吳江縣志稱其與羅洪先唐順之同榜皆以倡明道學爲己任明道專以朱子爲宗紹興府志又稱其  
博覽經史深於黃老觀此可見江浙人士之推重明道實尊爲一代大儒徒以其著述事實都漣吾里人竟不聽其  
品誼卓越如  
此可傷也

張明道字希程羅田人嘉靖中舉進士拜都察院都事謫濠州判官擢知吳江政務  
大體不拘文法約束持已修潔撫民慈祥國朝稱廉吏未有過於明道者也居期年  
擢刑部主事去民若失父母相與立碑紀德政仕終按察副使

#### 右萬歷吳江縣志名宦列傳

變強按此志傳家大人得自黃陂陳將軍毅傳後注列陳策所撰張公  
去思碑紀政績甚詳故傳從畧以其爲明代志乘頗不易得故亟錄入

張明道字希程羅田人嘉靖己丑進士授都察院都事歷刑部郎中擢紹興知府陞江西按察司副使明道少有大志視世利如敝屣發明晦庵綱目啟迪後人有濂洛關閩之風五十始登第清守如故別歷中外政績著聞爲一時循良之冠尋乞休歸濂志稱其攻苦食惡尹吳江日民立去思碑於三忠祠同邑萬傑胡明庶皆出其門

右徐學謨萬歷湖廣總志卷五十四獻徵志列傳

夔強按傳中萬傑乃萬全之謬全爲幼科方書序自云從游鉅儒張玉泉夫子之門

明史綱之學可證萬傑則里中無其人若全則亦明庶弟子不當列其上也

張明道字希程湖廣羅田人進士以都察院都事謫滁州判官會守闕署事築梅亭於醉翁亭右政暇輒造其下常以儉約刻厲攻苦食惡

右熊祖詒光緒濠州志卷四之二職官志名宦傳

張明道字希程湖廣羅田人嘉靖己丑進士授都察院都事謫滁州判官十三年擢知吳江縣時豪右橫甚明道始至即誅其桀黠者餘遂斂手邑賦歲數億萬前令取常例於糧長承以下效之明道爲文矢於神一無科索縣當孔道使節旁午餽遺少

### 重刊嘉靖羅田縣志

附錄

十

減則謗譏興明道一切裁省日剝民以求名吾不忍也民以訟至今自拘訊非大事不公差或骨肉忿爭召至以情諭之令感悔乃已朔望視學與諸生講析經義葺社學選鄉師童子俊秀者做古制作禮衣衣之祠廟橋梁所在繕飭所得俸錢多以充公用有一嫗鬻孫償官逋一孤兒以官逋被繫明道皆代輸解舍蕭然薪水或不給期年召爲刑部主事臨行止携來時兩敝籠而已士民攀號若失父母仕至江西按

察副使

松陵文獻葉志合纂

右馮桂芬光緒蘇州府志卷七十二明吳江縣名宦傳

夔強按萬歷吳江縣志明道傳甚畧但附去思碑於其下郭瓊康熙

吳江縣志定本卷三十名宦傳與此傳同但於仕至江西按察副使句下云卒年七十三明道與羅洪先唐順之同榜皆以倡明道學爲己任明道專以朱熹爲宗歷官二十年布衣糲食如寒士所著有學易稿詩經發蒙春秋大旨學者稱爲玉泉先生考此數語尤足見明道平生學術之抗衡名儒尤爲江浙人士崇服惜吾里人猶未知之也

張明道羅田人繼湯爲守無所更張務與民休息好立名義又慷慨峭直不拘準繩每聽斷訟獄輕重或不可測有玩世滑稽之意人呼爲張顛然實非顛也其學博覽經史尤深於黃老然蘊而不發諸生或抱狀立庭下先與談說今古稍中旨即判狀

得白不且訶使退矣當是時太守習爲寬大民視太守嘻嘻如父子不見可憚越俗上元鐙火甚盛太守偕郡僚角巾步市中觀鐙不以爲異郡署中有亭在臥龍山巔縱民出入登眺無禁也蓋羲皇世界故老猶能談之而今不可復睹矣

右張三異康熙紹興府志卷四十一名宦傳

變強按湯名紹恩安岳人上任紹興守愛民而好興作見府志卷十九職官張旭號張顛故借以寓

明分巡嶺北道按察司副使嘉靖二十五年張明道羅田人進士

右魯琪光同治贛州府志卷三十四官師統轄表

變強按明道前任爲江陰薛甲以懲贛中附嚴世蕃作奸者忤嚴嵩歸事在廿五

年後任爲內江高世彥亦以廿五年抵任度明道在贛道任不過數月耳殆有鑒於薛甲知不可爲故數月即去官也乃吾縣志自蔡容遠於明道傳有贛州紳士百姓扣關留餉九年之語以後沿訛不改不知任六年自是明道在紹興府任事何與贛州余考蔡志以後諸志爲明道傳幾於無一事不誤茲特一端耳特附訂正之

張濬列傳

張濬字口口平湖鄉人隆慶中以恩貢官南直徽州府學訓導偕武寧陳琅汝陽陰仁於學風頗有振作濬學有根柢資討鄉邦掌故有年嘉靖中方爲諸生值知縣而翊創修羅田縣志先訪得邑先達張明道諸人口傳筆語之底稿其初實萌於知縣

### 重刊嘉靖羅田縣志

附錄

十一

周英勞樟之譏諉更經教諭陳瓚訓導趙廷佐迭有商榷至是主爲綱要俾教諭楊鸞訓導洪炯督之而以濬及蔡惟忠兄弟專司編校濬與同人修書務爲別擇簡嚴以成削矜貴相要約取材近就方隅所遺不復求之域外大指循用當代所頒行一統志據爲例式初按六曹以彙括事類略如長編本之省部府部之志附以平昔別選索冥所得之舊聞而晉江蔡元偉以司諭繼至更爲之離合更置不一年而書成於舊稿之藝文汰除甚夥蓋珞本章懋門人元偉之學墨守程朱甚嚴濬等遂承厥旨用章懋蘭谿志體不矜尙博瞻而專貴峻潔亦緣羅田文獻宋元兩朝蕩盡無存卽明初亦半歸銷寂而僻地載籍復極寒儉觀其發凡之言欲舉所遺漏者俟諸博雅君子則其自畫與其自歎可知矣

據徽州府通志及祝志修

右列傳縣人王葆心纂

變強按鈔本高倬徽州府通志卷十一職官明府儒學訓導張濬羅田人隆慶中任同時官訓導者有武寧陳琅汝陽陰仁蓋府訓多有三四人也又志載涇縣訓

導有張濬按之乃天順中任則別是一人然方志年月多誤或是一人同省調任亦未可知又祁門縣明訓導有金百鍊萬歷中任吾縣明季亦有金百鍊張志有傳然但云縣庠生則官祁門者亦非吾縣之金氏也濬無他事可考然創志之役祇蔡氏兄弟及濬三人故家大人特爲之按此事立傳又蔡張志均佚濬名管志列濬拔貢中明代拔貢亦稱恩貢惟云濬官徽州教授注本通志則誤矣今正之

蔡惟忠惟孝列傳

蔡惟忠歲貢四川蒼溪訓導清介方正以造城有功陞知縣致政歸少受業於張明道之門博洽羣書精究性理大全及大學衍義補尤好蘇氏孟子以孝友垂訓子孫有耕讀二歌行世惟孝歲貢海寧訓導才情揮豁以禦倭寇功陞知縣因父芳年八旬書約兄同致政歸奉養

右蔡容遠康熙羅田前志卷四人物科貢理學傳

夔強按康熙後志以下列傳均仿此但缺惟孝一傳耳今不悉遺又容遠當屬惟忠

嫡孫故惟忠有傳惟孝無之

蔡惟忠字口口多雲鄉人處士芳子也早受學於張明道之門治經生家言明道授以宋五子之學遂精究性理羣書而歸於致用故於真西山大學衍義及瓊山邱氏衍義補辟灌尤深攻古文詞導源於孟子听夕取通行之蘇評讀本釋誦有得觸卷朱墨爛然留意縣之文獻每悼宋元以來缺修方志舊聞軼事荒墜殆盡有暇輒加蒐討方為縣諸生時既助知縣勞樟芻資工大修縣學宮庭於嘉靖十年藏事二十

重刊嘉靖羅田縣志

附錄

十一

一年夏復承知縣祝珣之屬佐教諭楊鸞訓導洪炯創輯縣志與同庠張濬及弟惟孝專編校之役於典章故事均準周官六典書之搜羅覲縷摭融貫已開近世鄧顯鶴修志之體甫數閱月鸞遷盱眙知縣晉江蔡元偉來促成之即今流傳之嘉靖志八卷是也書成簡潔修整羣頌創始之功惟忠旋以歲貢生授四川蒼溪縣訓導以清介方正為士人所推復力助知縣修造治城大府按其功狀方以知縣遷遽因終養乞歸惟忠學詣博洽而躬行孝弟垂戒子孫尤篤嘗撰耕田歌讀書歌二篇以示家法惟孝字口口讀書擅才情稟性伉爽揮霍與兄齊名既隨兄編校方志又從元偉與聞洛閩學愷嘉靖三十四年以歲貢銓授浙江海寧縣學訓導時知縣事為同郡麻城蔡完惟孝以與同姓同里雅意相與有成值倭亂方亟則協之增城浚壕俾四民皆入邑居悉力禦寇晝夜罔懈迭見功績縣賴以安三十六年即陞本學教諭復出其修書所得說完收召名流增輯縣書發凡起例綱目秩然方是時惟忠正司鐸蒼溪會父芳年過八十惟孝亦自以在儒官由副歷正前後四年頗能助地方

建白可以退休即日馳書惟忠約同時歸養里黨無不尊慕而稱頌之焉祝參志蔡志姜二管志及鄭溥

乾隆杭州府志修

右列傳縣人王葆心纂

夔強按史觀道光保寧府志卷三十二職官志明蒼溪訓導祇存十一人餘皆佚故缺惟忠名又鄭溥乾隆杭州府志卷六十四職官明海寧教諭蔡惟孝羅田人本學

訓導陞嘉靖三十六年任又訓導蔡惟孝羅田人三十四年任可見惟孝乃由訓陞論也又據名宦傳蔡完麻城人三十三年任有禦倭功則蔡志稱惟孝禦倭有功必是與完同事而杭志稱海寧志九卷完修其序謂校讐於內者有訓導蔡惟孝可證因惟孝本有是學也嘉靖海寧志今上海南洋公學尙有其書惜無從取而證之蔡張志稱惟孝陞知縣必是因陞教諭而傳訛康熙湖廣通志於二蔡均云官知縣亦沿舊志之訛也今悉訂之

重刊嘉靖羅田縣志

附錄

十三

王學博孝通繕校

王夔強家傳東安王氏宗譜卷十六之  
三 次分次公支家傳

王夔強派名家澣字中立一曰仲笠自署所纂農書曰多雲山樵又鈐章於所讀書曰困學齋生之年父葆心方教學漢南故小字曰澣但啜乳半載父以是年癸卯恩科捷鄉舉携家歸里度歲抵舍則乳童頓止以後遂哺以他物故童時體羸多病六歲隨父官京師從塾師一年遭鼎革展轉津漢入長沙又從師受書一年綴短文小詩有清氣便自喜搜覽說部入手不知倦一日手新齊諧並其續編指一則質其父曰是一事兩見宜難其一父喜語其母曰是兒必以考訂名家不然何其精神貫澈乃爾時年未十齡也夔強天性沈毅甚愛其弟每覽書訖輒與其弟作津津談居湘一年母氏葉病沒哀痛甚迫見父憔悴狀即歛容歛歎大祭之日隨父舉哀爲竟夕哭哭則涕垂尺許父命其從兄扶欄歸強必要與偕在家齋僧還湘依父明年父將還籍夔強先隨其周表姊歸朔望必携其弟洒掃母壙歷年不懈又明年遷青垞新居重開塾課強自是年始發憤爲求學之謀經史作文兼程並進課餘遇書即閱閱

### 重刊嘉靖羅田縣志

附錄

一

卽弗釋手仿湘鄉法讀看寫作四者日必輪徧四者之中尤以誦覽鈔錄占日力四分之二自寫程記無間其爲文至是年已拓成巨幅父課以題每一日必於論著攷訂編纂三者兼有其二夔強解其意於行間幅內咸以積書貫穿而成如是輒率己意以部勒羣書擬立兩賅日以網羅列代之文曰學術文鈔曰政治文鈔謂其拓域廣莫不克卽竣也乃先具篇目卽目隨時徵文既而又析餘力按製體纂文謂昌黎五原一體妙能詰發最初思詣而文以達之苟蒼其材可以精究一切事物原理但此體雖顯於韓而淮南彥和書中便開其朔遂自二劉原道以下抵見世統精粗而囊括之四閱月而訖都爲四冊乞其父製名父爲顏曰原林初編此爲夔強以鈔書爲纂述之初軌時年方十有四也蓋強是時以究文爲的其先謂文原於學與政其繼復以理統文之原故有以上三種之甄輯既而又悟無所謂文天下一切總要祇有學而已前明晚葉吾鄉耿恭簡肇創學案自是以來宋元明清諸儒學皆有案豈以周秦諸學鑣競而可無案乎周秦餘波兩漢未沫清代諸老師發明古學之功至



偉會稽章氏因周書昌春官禮卽千古學案一言而著爲兩種通義以名世獨無人肩任此作誠憚其紛囂而典奧也卽晚出小子曷敢有作然獨不可先儲其材乎乃銳意創立周秦學案長編卽夥鈔基厥始截分兩縣最先取各家之總繼析各家爲目自十五歲之春爰取經子史集及羣書中凡涉流略學者自立義例董而理之自後於九流總會之言所收可二十餘冊自儒家以下各家亦收至廿餘冊由家入鄂而都門而返鄂皆篋以自隨方在都時見父年已老弟妹晚出徬徨感觸從容與弟計議期二人各領方來之責謂弟夔武曰若年猶未也可從事外國文由之深造勿以今日諸生之囂風自染特專方言爲異時游學海外之先業我則志在承家姑隨俗博一法學家名目反而卽從吾所好於是告諸其父分入法文法政二校惟目睹旗民生計之苦世士浪游覓食之艱復慨然生返本之思與其弟及葉氏外弟相約究心農林各學備日後家居作業之實用始發大心廣搜舊新種植畜牧之書購假且鈔積之至百數十種最後又相訂爲譜錄書五種卽烏桕譜杉譜松譜栗譜罌桐

### 重刊嘉靖羅田縣志

附錄

二

不辦事月支乾薪  
貳百元固樹樸主刀

譜是也發凡起例強總其成其父見其方從事於此則付以平日所欲爲之伐蛟書諸條令其隨時踵成謂此卽爲防害農林之用與所講不歧也是時其父方總輯京師圖書館書目見其中收藏海內方志幾備欲乘機搜考本貫縣府省文獻命強爲助又久欲董治近代佳志義例爲方志學一書在長沙已具大綱至是亦命夔強參之而上海商務書館來徵說部父因付以辛亥在都所具之虞初支志各文字強卽因而廣之擬區爲甲乙以下十編先經其手輯成甲編八卷與書館版行復踵成乙編而夔強自領此種鉛槧諸役計在都三載自起居燕游及校課外盡日屏居非隱几觀書卽伏案鈔書逢假必在圖書館與小市廠肆他皆不見蹤迹於其父門人中與童學部德頤往還至密每一書入手畧一翻閱便曉大意近年每得一書恆父子互觀及相品藻則閤合者多其父詡爲家庭至樂目短視覽書敏捷而繕書迅如掃電頃刻數紙與其弟同懷異嗜弟好臨池喜吟詠強則獨耽樸學其父嘗擬二子將來可以各分父業之一謂強尋且跨之生有恆性一事不成不休屬草完整絕無譌

奪尤能助其父健忘事父先意承志以父喜睹未經目之書愛稀聞之事則窮搜以博父歡雖甚好書於滬市近出叢部亦貪且羨然以父館資所入廉苦卽購書亦不敢濫用一日爲人鈔書有傭資數十緡卽出以收授時通考廣羣芳譜清稗類鈔至盡而止其承父命摭採方志義例則有名諸方志序錄摘要畧備於廣攬地方文獻在黃郡則訪錄成如千冊在羅田則以新覓得之嘉靖祝志主之而爲之訂補垂沒之前兩月又擬輯一縣文詩命曰鳩茲文在鳩茲詩在又以暇日寫定其父續漢口叢談十二冊繕存其父晦堂文鈔如干卷其父在都又本強所得縣故成鈔溪舊話十六卷其未病之先一月手纂成青堦所有書目八卷卽纂卽寫而月而訖書訖而病作又於其間成諸子學表二卷大抵變強治學從目錄家入手故其啟疆甚闕而於裏采討治之條理次第又特有秩序不相凌躐自成童以後在在爲壯年中歲之預備其指歸在文質兩途復能行以不厭不倦故七八年而規模森然大備往後但循途以赴爾凡其作文治學旨在博綜先具定律周思窮覽用神禹鑿龍門工夫以

### 重刊嘉靖羅田縣志

附錄

三

關前人所未有又用神禹導原山川之法其淵源脈絡必皆秩然可尋真克自極其才者垂沒之春思詣又似一變欲作專究一業之課二月之晦手書告父謂方循日程手丹黃以觀書究主何業爲的質乞父裁奪其過銳處父時勗止自丁巳歲與其弟家居大病後父時刻妨其傷生在都尙清潔體亦強盛嘗授以養生頌調息箴導引書令仿行又從北方名師授太極拳不料乃以暑濕沒也其在國立圖書館所得有功於吾縣文獻甚巨其於羅田沿革有與其父異者父謂依姚惜抱說羅田爲漢松茲確矣至魏曹以後按以洪北江三國疆域志則爲安豐地夔強則謂引伸惜抱之指羅田在晉後似仍爲松茲相沿至劉宋而松茲始移於東北惜抱雖未明言而其意已躍然在言外二說各有據依尙待論定其訂補中則仍依其父說引伸之不欲立異也獨案以元豐九域志流水之稱而知今尤河乃緣流音轉變又因翠微先生北征錄西流河之稱而知今溢流河亦音近而轉變又因元明間英山羅田接壤有大埠砦之名而知禹貢大別在羅田之確因明物產中有巴山豆西山豆之名而

知水經注巴山在羅田宋書陳書西山在羅田之確又謂宋人輿地紀勝明言今上  
壑滯水所出之山曰雲山其雲山乃由古衡山音近而變故雲山之名存後人尙可  
緣此以考春秋時衡山所在亦緣九資河之名存後人亦因此可考春秋時鳩茲所  
在更證以太平寰宇記引古今地名解松茲卽古鳩茲一語直可發數千年未發之  
覆乃自元人改襲廣濟多雲山之名則古義已湮大半迄明末清初又歧出一天堂  
寨然當時方志尙兩名並存不料至乾嘉後竟以天堂寨目多雲山於是以寨名變  
山名洎光緒初於方志中竟銷除多雲山名惟霍山英山新志尙知以天堂爲多雲  
之誤由是與古名隔幾重障蒞後人欲考古義其奈此重重後起諸名之掩沒也哉  
羅田物產唐宋以來多冒以州郡之名卽如斬竹斬篔簹竹據元李衍竹譜詳錄皆  
產自羅田山中審此則唐宋題咏如劉禹錫韓愈白居易元稹諸作均爲羅田物產  
詠也後人泥於州郡轄隸之名又不見李氏之錄遂至徧傳海內之名產經諸名賢  
之表襮舉歸諸兩斬焉不重可歎哉又嘗讀臨川集見張彥博官石橋茶場知未析

### 重刊嘉靖羅田縣志

附錄

四

縣時先有此主筭巨產之官更證以文獻通攷見十三茶場之名證以夢溪筆談見  
石橋場歲產之額證以續資治通鑑長編而知乾德三年爲建是官之始而茶山均  
茶園衝及英山之茶園嶺茶園河皆當日之產地卽太平寰宇記茶山在縣北深山  
之說由茲可得其詰矣其於吾縣已湮之文獻在建炎以來繫年要錄及林泉野記  
知張俊之斬馬進在羅田山中繹求其地則今平湖有撒稻河乃由當日斬盜河音  
近傳訛在家塾聞人耕舊縣得鎮東軍節度使印考之宋周南山房集雜記知此印  
乃建炎三年諸將潰兵在建康雜入李成叛兵中鎮東軍亦當時隸杜充諸將之一  
由舒六入羅田治內所遺又於閩書得元祐八年創縣之令爲劍浦魏任於濟北先  
生雞肋集得創縣之尉爲祥符高道華又於元代得寓賢二人一孝子李鵬飛於元  
史孝義傳得之一忠臣夏璿於萬曆湖廣總志得之而夏璿受其孫忠靖太子少傅  
之封並可以訂正今日下太子地名之傳譌又取錢氏大昕元史氏族表以訂志  
析可立吉思爲一人之誤而知他書譯作闕里吉思者爲較通正且考光州志並知

此闕里吉思後遷爲固始金剛臺之達嚕噶齊其豁數百年之巨謬者又莫如吳大中旌孝記中稱其父季益建炎中宰羅田建炎乃景炎之誤否則按之一切都不可通又謂光緒光州志載光州固始商城近治都有霸王臺昧者均謬附之項羽不知霸王乃巴王一音之轉南北朝巴水諸蠻王爲司豫霍定諸州刺史治所均在今光固故留此遺迹凡此諸說殆不亞錢竹汀校史之精確雖古人亦爲之首肯者也父嘗命其搜求宋代羅田之藝文則於張右史集中得四詩因以知張文潛曾作縣之寓賢又令其求宋令詹魯山見於他書者則於葉水心集中得一律知魯山乃當時之解元又因爲蒲圻張氏採摭湖北先正書目則於徐氏培林堂書目見蕭繼美敬吾先生集十五卷於金氏文瑞樓書目見蕭譽多雲館稿十五卷於趙氏脈望館書目見周明璋焚餘草一冊又參考諸方志及問津書院志歷舉各證合之蕭氏宗譜定蕭繼其繼忠爲羅田人而非黃岡麻城人著草廬經畧之黃之瑞亦爲羅田人此類不可勝舉散見於所輯而未脫稿之嘉靖羅田縣志訂補及宋明羅田藝文總目

## 重刊嘉靖羅田縣志

附錄

五

錄此外又輯成附錄一卷此次輯譜庚申夏諸子聚青垞繕校凡有關考訂義例之資證多委之夔強亦時參預圖表之草創最後大河周氏來乞其父審定創譜其父遂一委之夔強並爲撰節孝家傳如干篇在都又受其父交代校鄭毅夫集卽今湖北先正遺書中刊本是也其他代父擬編教育部教育史並戴氏西夏紀之搜求及他文字甚多不悉著夔強檢書有從未經目之冊遇一事輒臚決某書當有之及發視往往十有八九如所測類有夙慧者然不可解也若其搜求與考訂大率於幽深不常見之故實持一端必又追其更端往往因表見裏由偏洞全遂爾一蠡大於車輪無他用心專一而穎悟又足以達妙緒也似此天生學者之才智卽少假以十年歲月其成就當有非目近所測者豈料其竟止於斯也哉夔強秉性謙謹似父雖卷軸填胸而與人若空洞無物記憶極強家藏五六萬卷書殆已覽其大半書未分類而能隨檢卽得自謂將來欲積卷秩盈十萬方止其績學而姿敏父多不令人以知懺生平名浮於實之悔久之世亦多知之者沒年纔二十有一其父執陳學部衍傳

孝廉守謙爲之傳饒員外叔光爲銘墓程觀察頌萬挽以詩周廳丞貞亮之詩尤痛惜之其他挽悼文字不下百數十篇皆以爲吾省學術惜非一族一家之私也其父嘗以謂辛亥以後視人世無可意者既喜得夔強因而歎古人所云父子之間相爲知己誠天意之所特鍾而替人亦於是乎在及沒則慘如失魂勢將與之同盡因一切視成人有加禮擬異日爲之立主後並整齊補綴未成之書以餉世人且以慰其

賈志焉陳學部傳論移綴此傳如左

陳衍論曰季薈余老友從事禮館時溫溫謙抑不知其家有異童蓋夔強生不逾三四齡也十餘年不相見季薈方父子幼學相依爲命忽千里馳書告哀於余夫舉世不悅學有讀書種子遂從而摧折之寧獨其父有祝予之痛歟

重刊嘉靖羅田縣志

附錄

六



